

東
華
續
錄

東華續錄

同治六十一

臣王先謙敬編

臣張式恭恭校

同治六年丁卯春正月丙辰朔元旦節停止筵宴○諭軍機大臣等趙長齡奏晉省防務喫緊咨調豫軍渡河協守並林壽圖奏請飭左宗棠先清秦境疏通糧路各摺片捻匪竄過渭北擾及三原高陵勢將東偪同朝該處與晉省僅隔一河防務異常緊急趙長齡見在分布水陸諸軍於蒲州等處要隘駐紮卽著督飭陳湜嚴密扼守並著曾國藩李鴻章李鶴年懍遵前旨分飭劉松山保英兩軍兼程馳赴同朝與陳湜所部晉軍聯絡聲勢互相援應毋任捻蹤東渡黃河鮑超一軍著兼程入秦痛剿逆氛援救省會不可再涉遷延亦不可以驅賊入晉爲卸責奮勉圖功毋干重罪並著

李鶴年籌糧米接濟援陝諸軍毋得稍分畛域左宗棠前已有旨令其迅速赴陝復明降諭旨令督辦陝甘軍務此時陝省情形更爲喫緊軍政廢弛已極著卽星夜馳赴嚴申紀律將玩法將領從重懲辦以冀肅清陝境乘勝入甘左宗棠未到以前陝省防剿事宜仍著喬松年勉力督辦將此由六百里諭知曾國藩左宗棠李鴻章李鶴年趙長齡喬松年並傳知鮑超知之○諭李雲麟奏布置烏科塔三城防剿事宜一摺李雲麟見因內地諸軍改由甘省前進所調蒙兵久候虛糜餉糈當與奎昌等商酌將札薩克圖汗盟兵責令繳回駝馬器械散回各旗而酌留賽因諾顏盟若干名專防烏城所需餉銀准由烏城操防經費項下支給卽由德勒克多爾濟覈實報銷該將軍務將此項蒙兵勤加訓練不得有名無實科塔蒙兵見均紮烏隴古河李雲麟擬卽前赴奇古招集民勇

簡練成營暫紮博里岡與科塔兩城蒙兵犄角先固烏科門戶所
籌雖是但須擇其實在可用者整頓教練以備將來進剿毋蹈從
前覆轍科城蒙兵見雖稍就範圍李雲麟赴奇古後奎昌明瑤仍
當認真防範隨時約束毋稍大意此項蒙兵調齊後需餉甚鉅著
福興迅籌款項源源接濟不得稍存膜視致誤軍食將此由五百
里各諭令知之○命陝甘總督左宗棠督辦陝甘軍務○飭山西
籌解蘭州慶陽軍餉各五萬兩○丁巳諭軍機大臣等前據喬松
年奏劉蓉軍政墮壞畱陝無益本日據劉蓉奏捻逆由藍田回竄
臨渭盤踞新豐官軍奮力擊走乘勝追襲中伏挫衄請飭左宗棠
由襄陽取道荆子關到陝會剿並密陳喬松年掣肘及貪利徇私
各情請另簡知兵大員接任又自陳與喬松年意見不合皆因公
事起見各摺片前有旨令劉蓉畱陝專辦軍務並屢諭其出省督

勦乃劉蓉藉病遷延不肯出省又久無軍報以致軍無統率屢次挫衄已降旨將劉蓉革職令其毋庸畱陝是劉蓉有心貽誤之罪已屬咎無可辭所奏喬松年掣肘並貪利徇私各情是否確實著左宗棠懷遵疊次諭旨迅卽帶兵入陝統率各軍維持全局並將劉蓉所參喬松年各節秉公查明具奏劉蓉摺片四件喬松年片一件均著鈔給閱看該督公忠體國久爲朝廷親信諒不至阿其所好稍涉偏私也將此由六百里密諭知之○予陝西陣亡提督蕭德揚等祭葬世職○己未諭軍機大臣等譚廷襄曾國藩奏捻逆竄及孝感經官軍截回連日攻勦情形喬松年奏捻蹤西趨盤鄂見在收集散勇重加整頓並相機出省各摺片此次竄鄂之捻雖經彭毓橘等連日追勦而總兵張樹珊以血戰遇伏力竭陣亡該總兵向來勦賊最爲奮勇失茲良將甚可憫惜著曾國藩李鴻

章迅卽查明請卹以慰忠魂張樹珊以統領大員被賊圍裹時何以無一人援救其所部安在是其營中彼此不相策應亦可概見並著曾國藩李鴻章嚴切查明痛懲積弊見在曾國荃擬困賊於棗陽鍾祥之下天門京山之上四面夾擊固是扼險之策第該撫前奏賊入鄂境必可殲除迨該逆旣入鄂境東西奔突仍不能制計湘淮豫各軍在鄂者數倍於賊旣有地險可扼必當思同心協力之效卽著曾國荃督飭各軍聯絡一氣毋使賊蹤再行他竄以期聚殲用慰厯念鮑超一軍前已奏報啟程入陝見在陝省正須勁旅協助未便朝令暮改再令赴鄂曾國荃雖久在軍營頗少定見鮑超毋得藉端折回徒奔馳於無賊之地致誤事機捻逆雖在德安而竄豫實在意中李鶴年仍當嚴防不可稍涉大意陝捻西竄盤鄂喬松年收集潰散兵勇尙未可用亦係實情著該撫趕緊

整頓訓練並俟劉松山郭寶昌等軍到後再行相機出省且賊蹤說詐並須豫防由楚陝乘虛竄入晉境至陝省上年灃橋之敗各營俱潰而譚玉龍一軍獨能全師出險黃鼎鄧太愚兩軍傷亡亦少俱當查明是否譚玉龍等平日馭軍嚴整抑或聞風先退卽著喬松年奏明分別懲勸庫克吉泰德興阿見在行抵何處著卽趨程前進懷遵前旨任在陝會剿捻逆不准稍有停畱劉松山一軍是否業已到陝並著曾國藩李鴻章喬松年催令入陝以資得力毋許遲緩將此由六百里諭知曾國藩李鴻章譚廷襄曾國荃李鶴年喬松年庫克吉泰德興阿並傳諭鮑超知之尋喬松年奏灃橋之敗譚玉龍係分路追賊未爲賊圍是以全軍而歸黃鼎且戰且退鄧太愚衝圍而出故傷亡較少均無聞風先退情事至先敗之提督邱時成劉玉興副將洪殿元均請革職不能救護統領之提

督蕭德見等均請摘去頂帶得旨邱時成等著革職劉玉興並著毋庸畱營邱時成洪殿元准其畱營帶隊剿賊以贖前愆蕭德見等著照所擬均摘去頂帶仍令帶隊以觀後效儻再不知愧奮卽著從嚴參辦○暫署四川總督崇實等奏陝西道路未靖廓爾喀貢使進京難以照常行走得旨著崇實駱秉章卽行知景紋瑞昌轉傳廓爾喀貢使毋庸來京免其跋涉道途以示體恤○庚申諭軍機大臣等穆圖善奏請募補陝甘綠營兵額酌撤直隸官兵及請飭陝甘舉行堅壁清野各摺片前因劉長佑趙長齡先後具奏請撤回調赴甘肅防兵當經諭令穆圖善酌辦茲據奏稱直晉官兵分防甯夏磴口甯條梁地當要隘難遽撤該將軍所部無多不能撥營前往接替必須先將本省額兵補足方能遣撤客兵自係實在情形甯夏鎮綠營兵額約七千人陝西定邊協綠營兵額

不下千人自回匪變亂後甯夏鎮標及定邊協標存兵均不過百餘人營伍空虛全賴客兵藉資捍禦殊非長久之計左宗棠入甘後著卽將甯夏鎮標兵丁查照原額迅募土著民人入伍勤加訓練並先會同喬松年將定邊協額兵依法照數補足以本地糧養本地兵旣免轉輸之勞亦係自強之策況穆圖善卽須剋期進剿兵勇難久駐河西甯夏各屬及陝西邊境該督撫須自固藩籬則營額尤當早補方足以壯聲威著左宗棠喬松年認真籌補以維全局穆圖善見將直隸提標兵二百餘名撤回其餘直晉官兵及精銳右營楚勇俟營兵招有成數再行遣撤卽著咨明劉長佑趙長齡知悉至堅壁清野爲制賊之要法陝甘逆氛徧地受害甚深若此法一行則民可稍安賊無所掠實爲此時急務第小民可與樂成難與圖始必須善爲勸諭方能一律舉行著左宗棠喬松年

迅飭地方官實力興辦不得畏難苟安各路統兵諸臣勦辦賊匪是其專責若堵禦不力任賊竄擾仍至蹂躪地方則穆圖善等不能辭咎也穆圖善另摺奏請飭催四川等省月餉已諭令崇實等迅解所請調金順來營一節著俟甯夏將軍印務接署有人再行酌量辦理又片奏請飭黑龍江先期撥兵二百名亦諭令特普欽照數挑撥俟此項兵丁到營後穆圖善即將存營老弱量加裁汰以節糜費將此由六百里各諭令知之○暫署湖廣總督譚廷襄奏捻匪回竄防兵單薄設法移撥力顧漢鎮以衛省垣得旨賊既趨重下游卽著酌量情形相機勦辦並著懷遵前旨會商曾國荃嚴檄各軍合力追剿以期殲殲毋任旁竄○辛酉諭軍機大臣等兆琛奏官軍攻克頗洞逆巢晃州力戰解圍銅仁接仗獲勝一摺頗洞賊巢經兆琛等設法攻克苗逆糾合教匪由玉屏等處下竄

晃州道員羅建章等奮力擊退該逆旋竄銅仁謝家橋各軍接仗獲勝另片奏苗教兩逆由銅仁竄至鳳凰廳沙羅寨等處官軍兩次接仗獲勝鎮筸邊界已無賊蹤李元度一軍進攻荆竹園屢克屯卡移營進逼賊巢兩獲大捷援黔各軍均獲勝捷尙爲得手著李瀚章兆琛督飭李元度等乘勝進攻務將苗教各匪節節掃除以清邊界兆琛所奏援黔軍務歸李瀚章奏報一片嗣後湖南援黔軍務如在湖南相近地方仍由李瀚章奏報若深入黔境卽由兆琛自行奏報以免繞折需時惟當據實入告不得僅憑各路稟報遽行具奏致蹈欺飾之罪將此由六百里諭知李瀚章並傳諭兆琛知之○廣江西興國縣學額十名○予貴州陣亡副將曹正祥等祭葬世職○壬戌李鴻章奏據總兵周盛波稟稱上年十二月二十一日與總兵張樹珊奉湖北撫臣曾國荃檄飭由應城折

向德安前進抵兩河口突見隔河胡家店一帶賊眾自北而南是日劉秉璋所部亦抵該處周盛波與之聯絡進剿該逆以馬賊衝突我軍開放炸礮連環轟擊自未至戌鏖戰四時逆眾始行敗潰全股俱向西北奔竄張樹珊與盛軍東西分進相隔約二十里是日午後至德安之王家灣適任賴牛李大股踵至眾約數萬張樹珊帶隊速進至新家牖見賊屯紮河東岸遂分所部六營左右夾攻自督副營居中馬隊四面游護我軍一擁衝撲過河賊即敗潰張樹珊督隊直追不意該逆大隊分路回鈔我軍被困重圍賊騎愈多各營衝突十餘次出而復入一面整立營牆復相搏擊賊退時已三更各營官不見統領尋至河邊始獲張樹珊屍身詢據逃回親兵云當賊回犯時該鎮督兵苦戰屢陷賊陣被圍垓心親兵二百餘人傷亡將盡張樹珊猶大呼衝突手刃數賊力盡陣亡

臣查右江鎮總兵張樹珊自咸豐四年隨臣在皖北帶勇血性忠

篤治軍精強嗣隨剿江浙所向有功歷克名郡轉戰東豫各省屢

獲大捷此次倉卒遇賊軍未敗而身亡悼惜曷已應請旨飭部將

張樹珊照提督陣亡例從優議卹並懇特恩予諡准於廬州本

籍及立功地方建立專祠以彰忠節其隨同力戰陣亡之副將劉

登朝等均請照原銜從優議卹並附祀張樹珊專祠再臣接會國

荃咨劉銘傳進抵德安會同周盛波等跟蹤追躡賊已向西北奔

竄如仍至京山天門尚可兜剿若由宋河集走隨州前路無軍攔

堵勢將入豫鮑超已回樊城恐調轉不及等語捻逆本極狡悍行

走如飛去秋兩竄東境年飢寨密無糧可據我軍乘勢偏之漸形

窮蹙此次竄鄂月餘飽掠人眾官軍疲乏輒爲所乘逆勢復張臣

見飭李昭慶由羅山麻城相機折赴豫境協力堵擊上諭軍機

大臣等見在捻勢甚張各軍俱至德安京山天門一帶山多路窄
可期兜剿著曾國藩李鴻章曾國荃嚴檄各軍設法堵剿毋令他
竄隨州一路無軍攔堵並著譚廷襄曾國荃派兵扼截李昭慶一
軍見由羅山麻城赴豫著李鴻章相機調遣李鴻章密片一件已
交軍機處存記候旨錄用矣將此由五百里各諭令知之○諭穆
圖善奏渡河查看回匪情形分別剿撫豫籌防守後路並請將羅
承勳嚴議各摺片回目馬生彥等眾屢次具稟投誠見已陸續渡
過河南並將靖遠縣城騰出是否真心悔罪抑或緩我師徒尙難
豫定穆圖善見酌帶兵勇渡河察看情形分別剿撫卽著該將軍
於渡河後嚴密確探如該回等實係真心悔罪卽飭令先將馬匹
軍械全數呈繳並遵疊次諭旨分良莠不分漢回妥爲分別剿撫
投誠回眾卽會同楊岳斌擇地安插惟該回性情狡詐穆圖善當

計出萬全不可草率受撫致貽後患中衛地方緊要並著該將軍派兵嚴防陝西捻匪肆擾恐其勾結回匪東竄涇慶等處均須妥籌布置穆圖善當嚴飭派出各軍實力嚴防甯條梁關繫餉道尤須豫爲防範該將軍已咨雷正綰等軍堵截並飭程興烈分兵駐守兵力尙單其直隸提標兵丁並准該將軍所請交參將徐祥林管帶星夜馳赴甯條梁地方駐紮以資捍禦前請奏撤之駐定續調直隸提標官兵卽著暫緩遣撤靖遠見已騰出該將軍卽咨商楊岳斌迅派地方文武前往鎮撫副將羅承勳於拔營啟程之先並未將奉調回晉緣由具呈稟報穆圖善聽候派兵更替徑行帶隊東歸殊屬冒昧惟係奉趙長齡檄調著改爲交部議處趙長齡檄調羅承勳並未知照穆圖善亦屬輕率著一併交部議處嗣後該撫如須檄調各路兵勇務當豫行知照該處統兵大員以期周

密不得輕忽從事致滋貽誤將此由五百里各諭令知之○予湖北新家牘陣亡總兵官張樹珊祭葬世職加等諡勇烈於立功地方暨原籍建立專祠副將劉登朝郭有容都司馬壽文知縣李輝麟守備黃瀚均祭葬世職加等一併附祀○癸亥以孟春時享

太廟 上前期親詣行禮○甲子諭軍機大臣等前因陝西軍務緊急各軍潰敗降旨將劉蓉罷斥令左宗棠督辦陝甘軍務並令庫克吉泰德興阿先赴陝省勦賊再行入甘又疊諭鮑超帶兵入陝諒已遵旨分道赴援茲據陝西紳士車順軌等奏上年十二月賊撲省城官軍三十餘營行至灞橋被賊圍裹傷亡大半省外四五里內俱係賊營官軍降賊者亦復不少加以西路回匪竄越汧隴萬一句結勢更滋蔓省城糧斷援絕若不飛調勁旅救援斷難保守請飛飭鮑超迅速赴援等語刻下陝西各軍新潰招集未齊

捻蹤分股竄擾無兵扼截蹂躪自不待言專盼各軍入關方能重整軍威力圖埽蕩著曾國藩李鴻章迅卽催令鮑超劉松山等軍兼程赴陝相機進剿仍兼顧山西河防慎勿驅賊入晉左宗棠已到何處未據奏報著卽星速入關統率各軍與喬松年力加整頓毋庸俟劉典募勇致稽時日左宗棠未到以前喬松年責無旁貸著卽招撫各軍保全完善慎衛省城鮑超一軍前諭徑行入關毋庸回鄂不得再有觀望致干重咎庫克吉泰德興阿由山西赴陝道途非遠卽著迅速拔營先剿陝西賊匪俟左宗棠到後各兵齊集再行斟酌進止赴援慶陽陝西各軍糧餉著左宗棠督飭王加敏妥籌報解以贍飢軍而維大局車順軌等原摺一件均著鈔給閱看將此由六百里諭知曾國藩左宗棠李鴻章庫克吉泰德興阿喬松年並傳諭鮑超知之○乙丑諭軍機大臣等鮑超奏捻逆

回竄襄樊牽掣官軍刻難西進飛商曾國荃派軍赴隨棗卽日拔隊馳往會剿一摺鮑超一軍數月以來僕僕道途未遇一賊前據曾國荃奏援軍陸續到鄂鮑超一軍可令入關朝廷亦因陝西望援孔亟是以疊次諭令星速入關該提督既報啟程又爲曾國荃奏畱何朝令暮改茫無主見若此鮑超如已遇賊接仗自當酌度軍情辦理如賊又遠颺仍卽懷遵本年正月初一初四初九等日諭旨迅卽拔營兼程援陝毋再游移觀望並准各軍均集楚境著譚廷襄曾國荃妥爲調遣嚴扼隨棗襄樊設法殲除以副委任將此由六百里諭知譚廷襄曾國荃並傳諭鮑超知之○丙寅諭內閣前因官文在湖廣總督任內動用捐款各情當經降旨交部嚴加議處茲據吏部議以革職自屬咎所應得惟念官文在湖廣總督任內十餘年歷經會同胡林翼曾國藩廓清江鄂勦勞甚著而

被議各款尙非貪污欺罔可比若遽盡予罷斥殊非朝廷保全功臣之意大學士一等伯官文著革去湖廣總督加恩仍畱伯爵大學士改爲革職畱任八年無過方准開復並罰伯俸十年不准抵銷卽行來京供職○諭軍機大臣等本月二十一日已故科爾沁博多勒噶台親王僧格林沁靈柩回旗本日已降旨令直隸總督盛京將軍順天奉天各府尹飭屬沿途照料惟念奉天屬境土匪尙未剿除淨盡必須派兵護送見在駐防昌圖廳諾令丕勒所帶兵丁五百名內有伯彥訥謨祜本旗兵一百五十名卽著都興阿迅速派員管帶前赴中後所一帶迎接僧格林沁靈柩沿途小心護送回旗以昭慎重將此諭令知之○以李鴻章爲湖廣總督仍在營督辦剿匪事宜調李瀚章爲江蘇巡撫命署理湖廣總督以劉崐爲湖南巡撫

由內閣學士遷

○以郭柏蔭署江蘇巡撫丁日昌爲江

蘇布政使

由兩淮鹽運使遷

○廣湖南衡州府學額五名衡陽縣三名○

戊辰諭軍機大臣等庫克吉泰等奏遵旨馳赴陝西先辦剿捻事

務一摺陝西自灊橋之挫軍情喫緊望援迫切庫克吉泰等擬由

山西入陝取道同朝兼杜該逆渡河竄晉之謀所籌甚是著卽與

德興阿督率所部催趲前進一面確探鮑超劉松山援陝等軍行

抵何處飛催會合竭力掃蕩但不得株守同朝觀望貽誤庫克吉

泰進兵後蒲州一帶河防著趙長齡督同陳湜加意布置以臻嚴

密另片奏請飭山西劃解月餉等語山西應解新疆餉銀前經諭

令每月劃出二萬五千兩解交庫克吉泰該軍由陝甘前進勢難

枵腹荷戈著趙長齡仍遵前旨督飭藩司自本年正月起按月照

數撥解毋誤要需將此由六百里各諭令知之○已巳諭內閣伯

彥訥謨祜奏扶送伊故父僧格林沁靈柩回旗安葬懇恩賞借四

年親王俸銀一摺已故科爾沁博多勒噶台親王僧格林沁靈柩回旗長途耗費用款實多著將伯彥訥謨祜應領親王四年俸銀如數賞給毋庸扣還以示朝廷篤念忠藎優加體恤至意○諭軍機大臣等譚廷襄曾國荃奏擒逆西竄連日追剿情形一摺賊眾回竄白口於沿河上下扮作難民窺伺漢水經淮軍鄂軍等擊退銳意西趨撲犯安陸劉銘傳率軍緊躡賊後曾國荃復調鮑超回勦鮑超一軍疊次諭令入秦該撫復令在鄂會勦實屬毫無主見徒令該提督跋涉道途迄未遇賊一擊老師糜餉莫此爲甚著仍遵前旨迅飭援秦卽已與賊相持湘淮各軍均在鄂境儘可妥爲調度禦賊狂竄曾國荃屢託空言殊無把握何以副朝廷委任之重著卽督飭各軍認真扼剿設法擒渠迅圖殄滅若僅以奏報鋪張敷衍搪塞爲得計該撫自問當得何罪曾國藩諒已赴徐接印

任事李鴻章已授湖廣總督該大臣交卸後自應進紮豫省扼要之地方能就近調度務當與曾國藩妥籌布置毋誤事機隨棗一帶已近豫疆李鶴年當力圖堵截不得任賊入境再致蔓延將此由六百里諭知曾國藩李鴻章譚廷襄曾國荃李鶴年並傳諭鮑超知之○諭劉蓉奏覆陳賊勢趨重地方見在籌辦情形請飭左宗棠星馳赴陝以一事權並陳與喬松年共事棘手鈔錄往復信函呈覽各摺片張總愚股匪見踞鄠縣之秦渡鎮花園鋪爲老巢其游騎或晝渡渭水擾及興平武功醴泉等處爲數無多劉蓉見將潰散各營整理就緒劉松山一軍亦於去臘抵省覽所奏籌策情形欲令劉松山由義井寨徑擣老巢則各路游氛不攻自息所籌未嘗不是而喬松年又欲令該軍先向西行自北而南又稱不必指定所向於剿賊情形辦理殊無把握賊之慣技每多方以誤

我師該逆大股皆在渭南若以游氛數十騎渡渭之故遂令勁軍
株守渭北不行進剿則陝省之賊何日可平耶劉蓉固係獲咎之
員然使所言尙合機宜亦當不以人廢喬松年何得固執已見專
事齟齬使諸將觀聽惶惑迷於所向左宗棠見在行抵何處何以
日久絕無奏報殊不可解陝省軍事孔亟若再貽誤關係非輕著
卽星馳入陝迅籌調度以一事權並著喬松年振刷精神廣咨方
略迅督劉松山等軍進擣該逆鄠縣老巢痛加剿洗不可爲賊牽
掣坐失事機如始終膠執貽誤疆事必治該撫以應得之罪懷之
劉蓉原摺片著發交喬松年並鈔給左宗棠閱看將此由六百里
各諭令知之○諭張凱嵩奏官軍查辦各土司積匪次第肅清暨
黔苗竄擾粵境堵剿獲勝情形各摺片思恩府屬各土司如定羅
舊城田州上林等處匪巢林立疊經張凱嵩飭令道員易元泰知

府熊壽山等分投攻剿將匪首陸特囊等投拏正法並陣斃積匪黃特發等多名九土司境地一律肅清辦理尙屬得手見在覃特學案內餘匪尙多潛逃難保不乘機復煽總兵官李士恩等軍均抵百色自與思恩聲息相通著張凱嵩迅飭熊壽山會同李士恩等實力搜尋將在逃各匪悉數擒誅毋畱餘孽並著嚴飭各該地方官於已受撫之民加意綏輯其陸四大等股亦著檄令總兵蘇萃超妥爲解散以靖地方黔苗竄入思恩之馴駐里社村及南丹土屬芒場等處雖經慶遠河池各處兵練截剿退回黔境究未大受懲創仍著張凱嵩責令各該府州縣就近集團防堵並會同營員相機剿擊毋任深入爲害荔波一帶與慶遠等處毗連該撫卽飛咨張亮基酌派兵勇馳赴荔波與粵軍聯絡聲勢迅掃賊氛將此由五百里諭令知之○予貴州陣亡縣丞劉培源祭葬世職○

庚午諭軍機大臣等劉蓉奏援師勦賊獲勝見催各軍繼進並請飭左宗棠迅速赴陝各摺片劉松山管帶援軍赴陝進紮義井寨捻逆大股由秦渡鎮等處來撲經官軍擊敗該逆見將渭北賊騎撤回併歸一處意圖合力撲犯官軍著喬松年督飭劉松山認真勦辦以期痛殲逆氛劉蓉屢經奉諭出省督勦始終因循貽誤前已明降諭旨革職飭令回籍所有陝省軍務卽著喬松年專辦劉松山老於戎事該撫務當虛衷與之熟商妥籌調度不可固執已見貽誤戎機湘淮各軍亦不可稍存偏袒致令各懷意見張錫霖所部各營著歸劉松山節制該撫當妥爲駕馭並整頓劉厚基等軍爲劉松山接應以厚兵力本日又據喬松年奏劉松山獲勝情形所稱劉松山進紮雨花寨與劉蓉所奏義井寨地名兩不相符究係渭南渭北其與平醴泉等處賊騎竄渡渭北者究有若干劉

蓉此次具報勝仗係於本月初九日發摺其革職前旨究於何日到陝並著喬松年查明覆奏劉蓉前奏有請撤去湘果各營另調皖軍之議見當兵力不敷之時豈容存此意見著不准裁撤卽著喬松年會同劉松山汰弱畱強酌量調用並與淮軍一律相待毋稍歧視將此由六百里諭令知之尋奏遵查劉松山接仗之雨花寨係在渭南距省十五里義井寨距省四十里劉蓉指雨花寨爲義井寨恐係迴護前言其分股滋擾渭北之賊計有數千至劉蓉革職於初十日恭錄行知在案初九日奏報勝仗係在未接行知之前報聞○諭前因已革陝西巡撫劉蓉操守尙好曲予優容乃於捻回偪近先請開缺迨賊竄陝省屢經諭令仍統軍出省督勦又復遷延觀望致令軍無統帥遇賊頓挫且於喬松年甫經到省卽與齟齬肆行糾劾以致互懷猜忌喪師奔潰大失機宜年前已

明降諭旨將劉蓉革職飭令回籍乃本日奏陳劉松山援陝擊賊獲勝情形一摺並未與喬松年會銜所稱劉松山之援陝係聞陝軍潰散爲該革員報仇雪恥而來又復意存攘功其實始終並未出省且昨奏渭北並無大股賊匪喬松年牽制湘淮各軍不令前赴渭南今日所奏勝仗如在渭南則喬松年並未牽制各軍如在渭北則與昨奏又不相符該革撫前次疊被參劾朝廷舍短取長並未苛求今居心如此難逃洞鑒著左宗棠於到陝後將劉蓉何日奉到革職回籍諭旨並本日奏到摺件是否在奉到革職回籍諭旨之後查明具奏此次所稱接仗各地名係在渭北渭南及劉蓉另片所陳喬松年傳見都司李良田示以親厚等語並陳該撫不諳兵事各節均著左宗棠詳查具奏劉蓉摺片均著鈔給閱看喬松年甫到陝境難保不巧懷趨避而劉蓉局量褊狹所奏亦未

必俱係實情該督總當以國事爲重秉公查覈辨明是非不可稍涉偏袒見在陝事孔亟左宗棠無論行抵何處卽著星夜馳赴關中以顧大局將此由五百里諭令知之○諭張亮基奏賊撲安順府城官軍擊退並水城廳屬苗匪投誠各摺片貴州逆首潘名桀等勾結狎苗各匪數萬於上年十月間攻撲安順勢甚危急經署提督趙德光道員畢大錫等督軍進擊斃賊甚多城圍立解該逆向廣順州邊境竄去逆匪雖已遠竄難保不復思窺伺著張亮基督飭該地方文武一體督練防禦不得稍涉大意其水城廳苗匪竺老五等率眾投誠並未呈繳軍械是否真心悔罪仍著飭令署通判袁開第加意防維相機安插儻能辦理妥協使地方得以安靖准其將在事官紳擇尤保獎將此由五百里諭令知之○丁寶楨請召募吉林黑龍江壯丁訓練馬隊以制捻賊從之○飭河南

山西按月運濟陝西軍糧○予陝西陣亡翰林院編修張錫嶸貴州陣亡副將倪乾榮等祭葬世職○予貴州陣亡副將葉有貴祭葬世職建祠遊擊宋朝陽等祭葬世職附祀○辛未諭軍機大臣等李鶴年奏豫省布置情形擬出省調度一摺捻蹤竄擾鄂疆勢熾益熾見經官軍齊集堵剿其折竄豫境亦在意中李鶴年見已將省城防務辦有頭緒並將防河礮船添設增募水師一營定期出省著卽暫住許州就近調度務當嚴防邊境毋令賊蹤闖入是爲至要另摺奏請將豫省京協各餉及厯屆漕折暫行停撥一年爲添兵剿賊之用豫省兵力本單不敷辦添隊練兵勢不可緩該撫所請自係實在情形惟京協各餉均關緊要應如何通盤勻撥之處著戶部妥速議奏他省不得援以爲例將此由四百里諭令知之○壬申諭軍機大臣等瑞麟蔣益澧奏圍剿曹冲及剿辦

五阮客匪均獲勝仗各一摺曹冲逆匪經總兵周廷瑞徐文秀等督軍進攻雖屢獲小勝尙未能大加懲創該處地勢險峻路徑叢雜必須困以長圍斷其接濟所籌亦尙近理惟賊氛並未大挫曠日持久變故滋生不可不嚴爲之備著瑞麟蔣益澧督飭諸軍嚴扼要隘以杜旁逸提督高連陞所部於正月中旬可抵曹冲卽著令其會督各營合力進攻但使機有可乘卽當迅圖蕝事不得老師糜餉坐任遷延其五阮客匪旣經副將鄭紹忠等攻破百鶴老巢及鹿田寨白洞等處勦辦尙爲得手仍著查明匪首陳疇等蹤迹以免死灰復燃並飭該副將併攻南五阮匪徒大張撻伐再行相機勦撫毋任久踞將此由五百里各諭令知之○癸酉諭軍機大臣等都興阿奏斟酌奉省軍務請將五行隊暫緩撤回並按匪禁賭情形暫畱富和帶隊各摺片奉省匪徒尙未淨盡難保不復

圖嘯聚所有天津五行隊駐紮大孤山控制搜捕既關緊要著准暫緩撤回以資得力惟奉省爲根本重地必須設法自強都興阿帶兵有年見復身膺重寄著卽斟酌奉天情形抽練兵丁儲備將才以期日有起色俟本省兵力足敷調遣各路奸匪皆知斂戢卽將五行隊撤回至邊外圍場各處應如何妥爲經理以期永無後患之處亦應豫爲籌畫不得畏難自阻專恃客兵爲敷衍目前之計富和等在法庫清和邊門內外等處搜獲匪犯多名先後訊明正法辦理尙爲出力富和著准其暫畱奉省仍責令該副都統等將窩畱賭匪私藏軍械之處實力搜拏俟搜剿稍清卽令赴任杜嘎爾一員見在計已假滿著都興阿催令迅速赴任毋許藉詞延宕將此諭令知之○左宗棠奏臣由閩啟行時念舊部分駐兩省得力將領除蒙恩簡放實缺外均已奏委署理要缺鎮將若檄調

隨征則閩浙頓覺空虛殊爲可慮雖各員告請西征概未敢許其所攜以同行者僅三千餘人奏請劉典幫辦軍務亦僅令選募舊部三千人初意南人用之西北本非所宜祇可多挑營官哨長之才入秦後再將陝甘見存各營兵勇分別汰畱而勻撥膽技稍優弁勇充當親兵護哨編列成營以倡勇敢之氣庶臣部行糧可資節省而陝甘飢軍亦可漸有位置兩得之道也又臣軍頻年轉戰東南山澤之鄉無須多用馬隊每次上口採買爲數本屬無多當由閩拔隊之時以嶺嶠艱阻水陸數易所有戰馬驅以隨行必形疲乏故遂畱之閩中原擬抵鄂後派弁上口採購至鞍韉一切又須在陝西製買故前此豫先陳明抵鄂抵西安後均不能無少耽延也昨抵黃州接見守令始知捻逆大入鄂疆漢黃德一帶均形震動復奉寄諭竄陝捻逆又已擾及南山傳聞賊蹤蔓延甚廣萬

騎縱橫鄂陝官軍均不得手臣於二十六日相度營地暫於漢口

鎮北橋口地方安紮六營二十八日入駐新營一面飛催劉典迅

速選募成軍來鄂會隊并增調各營於原擬六千人外再加募六

千合成一萬二千人均限一月到鄂惟馬匹無從購覓託官文代

爲搜索亦僅得馬二百八十餘匹而已諭旨飭臣由鄂入秦先勦

陝逆此時臣軍步隊僅止三千餘馬隊尙未習練雙輪獨輪車式

尙未動工製造所擬以制賊者步隊馬隊車營而皆無以應手倉

卒就戎必貽後悔臣不敢不慎也方今所患者擒匪回逆耳以地

形論中原爲重關隴爲輕以平賊論勦擒宜急勦回宜緩以用兵

次第論欲靖西陲必先清腹地然後客軍無內顧之憂餉道免中

梗之患謹卽一面就地採買口馬練習馬隊先造獨輪礮車暫應

急需俟所調各營取齊由襄樊出荆紫關徑商州以赴陝西卽古

由武關入秦之道沿途遇賊卽擊比抵陝西則製造雙輪礮車兼雇買車輪俟採買口馬到陝增練馬隊並習車營一面開設屯田總局相度秦隴緊接要隘有水草可田可牧者開設屯田一面汰遣陝甘各營去疲冗省軍食爲久遠之規其願畱屯田者編入冊籍指地屯牧不願畱者資遣散回各本籍禁其逗畱爲患然後軍制明而內訌可以免屯事起而軍食可漸裕也甘省同多於漢蘭州雖是省會形勢孑然孤立非駐重兵不能守駐重兵則由東分剿各路之兵又以分見單不克挾全力與俱一氣掃蕩將來臣軍入甘應先分兩大枝由東路廓清各路分別剿撫俟大局戡定然後入駐省城方合機局是故進兵陝西必先清關外之賊進兵甘肅必先清陝西之賊駐兵蘭州必先清各路之賊然後餉路常通師行無梗得以壹意進剿可免牽掣之虞亦猶之江皖布置周妥

然後入浙浙江肅清然後入閩閩疆肅清然後入粵已復之地不
令再被賊擾當進戰時卽豫收善後之效民志克定兵力常盈事
前計之雖似遲延事後觀之翻爲安速也自古邊塞戰事屯田最
要臣已屢陳其利矣漢宣帝時先零羌反趙充國銳以自任其所
上屯田三疏皆主持久之義宣帝屢詔誚責充國持議如初卒收
底定成效可知兵事利鈍受其事者固當身任其責至於進止久
速則非熟審彼己長短之形飢飽勞逸之勢隨機立斷不能此蓋
未可以臆度而遙決者也臣頻年轉戰東南於西北兵事未曾經
歷所部均南方健卒於掄回伎倆並無聞見若不愼之幾先加以
迫促誠恐所事無成時局亦難設想明臣孫傳庭催促出關卒以
致敗可爲前鑒也伏懇 皇上假臣便宜寬其歲月責臣以西陲
討賊之效不效則治臣之罪以明軍令臣惟勉竭駑鈍次第規畫

以要其成勦捻勦回均惟事機所在若兵力未集馬隊未練屯務未舉車營未成則無所藉手以報 君父 臣雖身任咎責無補時

艱此則耿耿愚忱有不能不豫爲披瀝者 上諭左宗棠奏敬陳

籌辦情形請將劉典開缺另簡楊岳斌奏回捻勢將句結請飭鮑

超入陝劉蓉赴涇西甯回匪日逞奸謀大臣受其挾制各摺左宗

棠所稱進兵陝西必先清關外之賊進兵甘肅必先清陝西之賊

駐兵蘭州必先清各路之賊實爲動中竅要所稱採買馬匹練習

馬隊先造獨輪車應用俟所調各營取齊由襄樊出荆子關赴陝

抵陝後製造雙輪礮車兼雇買車輛俟採口馬到陝後增練馬隊

並習車營一面開設屯田總局汰遣各營均著次第辦理陝西已

有劉松山一軍在彼並收集湘果各營鮑超一軍亦已令其入陝

該大臣若以所部先駐西安不慮無兵調度若必俟劉典等到營

一同入關深恐有稽時日著卽就見有兵力取道入關妥爲籌辦以副期望左宗棠未到以前喬松年務須懷遵疊次諭旨認真防勦毋稍大意劉典已開缺賞三品卿銜幫辦軍務著左宗棠催令卽日募勇到陝母任逗畱張岳齡已授甘肅按察使並著飛咨劉坤一飭令該司督率所部三營赴任藉資坐鎮楊岳斌請飭鮑超速行入陝已疊經傳諭該提督星速進關援勦著左宗棠等再行嚴催劉蓉藉病不肯出省任意抗違致有滿橋之挫湘果各軍損傷大半見復與喬松年齟齬不合業經降旨將劉蓉罷斥斷難冀其得力楊岳斌所請令劉蓉赴涇之處著不准行並著喬松年酌度軍情派軍赴涇駐紮毋得視爲緩圖致回捻勾結爲患益深西甯回匪日逞奸謀玉通將漢圖全行撤去受其挾制將來必難自保楊岳斌見令孟柏林等仍行練習舊卒招募新軍著密飭妥爲

豫備此摺著鈔給左宗棠閱看楊岳斌在任一日務須盡一日心力不得稍存退縮之見俟左宗棠將陝省底定方能息肩也將此由六百里各諭令知之○諭左宗棠奏兵力較單請調高連陞所部隨同西征等語見在左宗棠由鄂入關先應勦辦秦中之匪該省捻回匪數太眾必須厚集兵力方能掃蕩逆氛著瑞麟蔣益澧迅飭高連陞統率所部九營由惠州嘉應踰嶺而北出贛州順流而下溯江抵鄂取道襄樊前進以爲左宗棠後路聲援高連陞所部行糧仍由廣東籌給毋令缺乏並著蔣益澧於香港購辦上好洋槍二千桿及槍藥銅帽卽交高連陞解交左宗棠軍營將此由六百里各諭令知之○諭劉嶽昭奏官軍攻克沙窩等處賊巢黔西境內肅清並疏通省路一摺黔西沙窩踞賊圍困州城經劉嶽昭張亮基派令副將鄒復勝李忠恕等督隊進攻焚毀賊巢斃賊

無算州城得以解圍其由凹腳圍攻衙院股匪亦經總兵宋華美等奮力追殺賊向白果坪竄去各寨率眾投誠黔西境內均已肅清辦理尙屬得手所有在事文武員弁紳勇著劉嶽昭擇尤彙案保奏毋許冒濫黔西濫泥溝鴨池河等處爲入省必由之路而沿河一帶小路紛歧賊匪易於藏匿仍著劉嶽昭檄飭鄒復勝謝景春等隨時按捕擇要進紮以爲貴陽聲援張亮基亦當責令各該地方官會同劉嶽昭各營協力嚴防不得以地方稍定輒形鬆懈其平遠州情形若何並著劉嶽昭等派員確加偵探相機辦理劉嶽昭另片奏糧米支絀擬分咨川黔設法採買等語仁黔清鎮等處野盡榛蕪糧米無從接濟自係實在情形著崇實駱秉章張亮基按照劉嶽昭所咨迅籌米石委員解赴該撫行營以資軍食劉嶽昭仍一面乘勢渡江力圖勦辦毋得停兵待糧致滋貽誤該撫

又片稱患痢甚劇仍在仁懷調理等語見在黔中軍務稍有起色
所望於該撫者方殷著卽趕緊調治尅期前進以副委任將此由
六百里各諭令知之○命陝甘總督左宗棠爲欽差大臣督辦陝
甘軍務賞甘肅按察使劉典三品卿銜幫辦欽差大臣左宗棠軍
務○予甘肅陣亡提督羅進賢殉難知州沈鳳才等祭葬世職○
甲戌諭軍機大臣等英翰奏撥兵援陝等情一摺陝省情形危迫
待援孔亟英翰見遵前諭將郭寶昌一軍調赴陝省並將該員正
二兩月餉銀委員解交期於十日內啟程實能不分畛域力顧大
局深堪嘉尙著卽飭令郭寶昌迅速拔營兼程西進毋稍遲緩並
著喬松年趕緊催提入陝與劉松山合力進剿痛殄狂氛如捻匪
被剿竄出陝境卽著飭令郭寶昌一軍作爲遊擊之師視賊所向
盡力窮追不必畱駐陝境專顧一隅致誤全局前經諭令趙長齡

仍按月撥協皖餉一萬兩著自二月以後改解郭寶昌卓勝軍營此係緊要之款該撫務當按月協濟不准稍有推延並著喬松年派員迎提以免飢潰之虞程文炳一軍既由英翰調往商城卽著飭令扼要駐守嚴密防堵以杜鄂捻回竄之路另片奏請來京陛見等語皖省軍務雖覺稍鬆惟當防堵緊要之時正須該撫在彼調度未可遽行離營著俟軍務大定後再行奏請入覲將此由六百里各諭令知之○乙亥諭軍機大臣等訥爾濟奏哈密見在情形擊退竄撲巴城回匪請飭李雲麟派兵撥餉催成祿出關救援各摺片何瑄奏哈密情形並請催援兵各摺片哈密回匪猖獗西撲巴城經訥爾濟何瑄督率兵勇擊退該逆見復糾集黨與希圖回擾著訥爾濟伊勒屯何瑄激勵兵勇嚴密防剿見在巴里坤情形緊急著李雲麟飛催棍噶札勒參整齊蒙兵馳赴巴城先保完

善以固根本並酌撥軍餉解往應用成祿圍攻肅州日久未下甚屬疲玩著卽剋日將肅城攻克星夜出關恢復哈密先清東路與巴城聲勢聯絡再圖西進毋再玩延致干重咎訥爾濟因目疾失明本日已明降諭旨准其開缺回旗矣將此由六百里諭知李雲麟成祿訥爾濟伊勒屯並傳諭何瑄知之○丙子諭內閣總理各國事務衙門奏請派員充總管新設同文管事務大臣等語太僕寺卿徐繼畬老成望重足爲士林矜式著仍在總理各國事務衙門行走充總管同文館事務大臣惟寺務恐難兼顧著開太僕寺卿缺以專責成而資表率○丁丑諭軍機大臣等楊岳斌奏病勢增劇懇恩賞假調理請飭催左宗棠入甘一摺楊岳斌所陳患病情形覽奏實深廕繫著賞假一箇月安心調理惟秦省匪勢鴟張左宗棠先須入關剿辦俟秦省底定方能移師入甘左宗棠未到

以前楊岳斌責無旁貸仍著懷遵疊次諭旨力疾從公將甘省兵
事餉事及各路防剿機宜妥爲調度儻有疏虞仍惟楊岳斌是問
曹克忠前因患病赴陝見在計可就痊該員所部各營久無將領
統率軍心不固時有潰散之虞著喬松年檄飭曹克忠迅卽馳回
甘省統率舊部掃蕩逆氛儻該提督有託病遷延情事卽著喬松
年據實參奏以儆驕悍甘省軍事孔亟糧餉兩絀應如何全局統
籌妥爲兼顧之處著左宗棠相機辦理將此由六百里各諭令知
之○戊寅諭內閣朕奉 慈安皇太后 慈禧皇太后懿旨三載
考績爲國家鉅典中外滿漢諸臣有能爲國宣勞勲猷卓著者允
宜特予甄敘以示寵榮茲當京察屆期吏部開單題請詳加披閱
恭親王首贊樞廷於今六年小心謹慎夙夜勤勞克盡匡襄深資
輔翼著交宗人府從優議敘吏部尙書文祥戶部尙書寶鋆都察

院左都御史汪元方同心贊畫勤慎和衷均著交部議敘協辦大學士兩江總督曾國藩公忠素著保障東南陝甘總督左宗棠嚴疆馭歷謀畫忠誠湖廣總督李鴻章才略優長不辭勞瘁四川總督駱秉章老成碩望宣力彌勤均著交部從優議敘餘著照舊供職○諭軍機大臣等劉長佑奏直隸軍宜速成計早決一摺直隸練兵之舉原以拱衛京師且布置已有成規勢難再行改撤前因餉需恐有不敷經總理各國事務衙門會同戶部議奏請裁兵數係爲節省經費起見茲據劉長佑奏陳兵難覈減情形所論頗爲詳備著仍照六軍原議兵數營制挑練毋庸另議減改所需餉銀卽著戶部於各省應解固本京餉內支給並著戶部催令各省督撫勒限撥解儘有遲逾或解不足數者卽著戶部按撥解京餉遲延例嚴行參奏其續練二軍亦仍照戶部原議籌撥辦理俾直隸

新練各軍得免匱乏之虞經此次諭定之後劉長佑責無旁貸必當專心挑練不得瞻徇情面稍涉遷就推諉之見致負委任儻事無成效教練徒事虛文馴至有羅惇衍所陳十慮等弊惟該督是問將此諭令知之○諭前有旨授左宗棠爲欽差大臣督辦陝甘軍務因思山西與陝西毗連防堵甚關緊要捻匪業已渡渭沿河一帶尤須加意嚴防該省見派臬司陳湜帶勇防堵兵力尙單惟恐與陝西各軍聲勢不能聯絡左宗棠到陝後當妥籌兼顧所有山西在防各軍卽著歸該大臣節制調遣與陝西兵勇合力防剿以期聯絡聲勢互相援應力保完善兵行餉隨並著左宗棠咨商趙長齡於陝甘新疆應解各餉籌款源源接濟將此由四百里各諭令知之○己卯李鴻章奏上年十二月二十四日劉銘傳由宋河追賊至京山正值大股繞撲縣城當派劉盛瑞等帶隊猛擊擒

斬三百餘名二十七日追至舊口賊踞下沙港二十八日該逆率眾向西佯走圖誘我軍經劉銘傳擊殺數十人三十日追至宜城縣境之流水溝本年正月初一日督隊鈔出賊前該逆由冠山口出竄劉銘傳率軍追殺擒斬千餘名並擒賊首王信等數名該逆被剿又由河邊折竄安陸銘軍仍由宜城北路追下此劉銘傳一軍援楚獲勝情形也劉松山張錫嶸李祥和等曾國藩派援陝西行抵西安正值劉蓉所部潰敗之後劉松山等探知張總愚逆眾悉竄西南盤鄂一帶游氛擾及近省之秦渡花園鎮梁家橋遂於正月初三日拔赴城西十八里之魚化鎮初六日賊馬步大隊結成十餘團蠡擁來撲劉松山督飭各旗迎擊編修張錫嶸自率百餘人乘勢衝突誤陷賊陣登時傷亡該逆復分馬賊悍黨拌命撲營我軍勇氣百倍戰約數時劉松山等見賊將不支率隊齊追殺

斃千餘名生擒百餘名奪獲羸馬七十餘匹此劉松山等軍援秦
獲勝情形也臣查任賴等股流竄鄂中趨向不定初欲由安陸竄
襄樊與秦賊句合賴鮑超扼之樊城劉銘傳兜擊棗陽宜城一帶
遏其西北之路該逆計不得逞仍由安陸回趨准曾國荃函稱該
逆將由京山竄往宋河則北走隨應東窺黃孝均未可知聞鮑超
於初四日自樊城拔隊南下劉秉璋周盛波進駐京山鄂軍在早
市天門一帶曾國荃復調李昭慶一軍由信陽州入鄂兜扼似得
分布之勢第入春以來雨雪連綿師行阻滯而逆勢剽疾一瞬間
攔頭者變爲尾追前進者恐又落後但冀有一二勁旅相值得以
會合痛剿或可稍挫其鋒曾國荃以任逆如再竄陝爲患更烈擬
暫畱鮑超在豫鄂之交來往扼塞俾淮軍逐賊而東庶賊勢分而
糧運較易似亦老成之見再曾國藩遵旨回任於正月十五日行

抵徐州

臣

於正月十九日將兩江總督關防兩淮鹽政印信委員

齎交曾國藩接收

臣

卽於是日卸事合並陳明

上諭軍機大臣

等劉銘傳一軍援鄂由宋河追賊至京山宜城一帶連破賊伏疊獲勝仗該逆折竄安陸劉銘傳仍由宜城北路追躡著李鴻章卽檄飭援軍盡力勦洗並嚴扼捻蹤回竄棗陽樊城之路譚廷襄曾國荃分布各軍四面兜剿就地殄除毋任旁竄鄰省劉松山一軍援陝在魚化鎮獲勝已據喬松年劉蓉奏報惟捻股人數眾多劉松山兵力尙單亟須鮑超入陝援應前已疊次嚴諭此軍入陝曾國荃何得任意畱住鄂境著李鴻章懷遵前旨嚴檄鮑超剋日拔隊西行不得抗違致誤大局曾國藩既經接授兩江督篆所有察吏籌餉及地方應辦事宜均關緊要且金陵亦不可無勦望素著大員坐鎮著卽回住省城以資鎮攝該督公忠體國自當仰體朝

廷倚畀之隆勉爲國家宣力一切軍情並調度事宜仍著李鴻章隨時咨商以資裨益將此由六百里各諭令知之○庚辰諭軍機大臣等鮑超奏官軍大獲勝仗巴揚阿等奏擒逆欲渡襄河激圍豫備各一摺鄂城盤踞楊家澤拖船埠永樂河一帶經劉銘傳鮑超先後進剿將三路賊眾擊退官軍四面圍剿追殺六十餘里斃賊甚多辦理尙爲奮勉任懷邦賴汶洗是否殲斃著曾國荃查明具奏並著曾國藩李鴻章曾國荃督飭劉銘傳等軍將敗殘賊眾盡力剿洗毋任死灰復然楚賊已屬無多兵力足敷剿辦儻不趕緊肅清再致竄擾惟曾國荃是問鮑超一軍仍著迅速援陝該提督所向有功不得因循自誤入關以後軍情咨報左宗棠具奏巴揚阿等奏布置襄河情形尙爲妥協卽著曾國荃迅飭左光培等抽撥礮船駛赴沙洋會同樊國泰等實力堵禦仍於陸路酌分一

軍渡過西岸擇要屯紮與藍斯明所部聯爲犄角之勢如該逆渡河卽著文全帶兵馳往沙洋會同痛剿毋稍疏失將此由六百里諭知曾國藩李鴻章譚廷襄曾國荃巴揚阿並傳諭鮑超知之○子湖北陣亡總兵官陳永唐等祭葬世職○辛巳諭軍機大臣等曾國藩奏赴徐接印任事一摺覽奏欣慰著該督卽遵前旨回駐江甯省城籌辦糧餉及地方事宜以資坐鎮另片奏請畱鮑超一軍於豫西攔截任賴不使西竄等語鮑超一軍已在楊家澤地方大獲勝捷昨據該提督奏報督軍追剿見計旬餘諒可次第殄滅湖北兵勢已厚劉銘傳等軍當已足敷剿洗本日據林壽圖奏回逆竄陝軍情萬緊劉松山一軍勢尙單薄鮑超仍當迅速援陝以資得力該軍糧運雖有辟書常在晉籌辦仍著該督源源接濟毋令有所藉口將此由五百里諭令知之○諭林壽圖奏甘省東路

同氛猖獗分股西侵運道益梗陝臺移置漢中辦理報銷並陳慶
涇可慮情形各捐慶陽被困已久穆圖善尙在中衛庫克吉泰等
亦一時不能赴援雷正瑄勢力不支涇長均遭蹂躪該匪復挾同
游勇從宜君耀州富平三原竄擾蒲城渭南臨潼等處至大荔之
八女井王閣村盤踞潘驛同朝完善之區人民惶亂邠長門戶空
虛未籌防堵本日已諭令穆圖善迅赴慶陽喬松年派兵赴邠長
一帶防剿惟捻回蹤迹已近難保不暗中勾結穆圖善喬松年均
恐不能抵禦著左宗棠統籌全局入關調度務須保固同朝等處
兼顧山西完善之區毋令回氛肆擾鮑超一軍已在鍾祥地方大
獲勝仗鄂軍足敷剿殄該大臣卽督同鮑超入陝以資得力林壽
圖摺內所稱雷正瑄間被捉放回及喬松年議加釐改捐每遇醫
缺不由司擬輒先授意而於諸將未有指揮各等情著左宗棠於

到陝後密查具奏林壽圖所陳糧臺既改漢中各省應解慶陽協餉甘省應支慶涇月餉應統歸陳丕業辦理請飭陝甘總督湖廣督撫迅催候補道陳丕業限二月初旬由荆子關馳抵漢中督辦各局事務卽著左宗棠咨湖廣督撫催令該員剋日前往悉心妥辦毋稍遲緩陝甘待餉孔亟並著左宗棠照林壽圖摺內所稱咨行鄂臺將六年三月以前已解到鄂各餉均兌運西安並前次准撥之山西河東各五萬兩由左宗棠飛催該撫飭司道如數速解以救眉急林壽圖另片奏請飭左宗棠審量進兵之路先籌糧運之區庶免臨時掣肘等語著左宗棠竭力籌畫以期軍食有資林壽圖摺二件片一件均著鈔給左宗棠閱看將此由六百里諭令知之○諭前因慶陽被圍諭令穆圖善率師前往勦辦近聞回匪益肆蔓延馬步數萬屯踞郝家寺賈家黑莊東華池梁家扁等處

涇長均遭蹂躪雷正綰進勦勢力不支慶涇被困已久亟撥兵救
援穆圖善是否尙在中衛著卽統率所部前赴慶陽節節掃蕩迅
殄回氛儻再遷延觀望頓兵不進致慶涇或有疏失恐穆圖善不
能當此重咎也懷之回匪挾同游勇從宜君耀州富平三原竄擾
蒲城渭南臨潼等處至大荔之八女井王閣村盤踞潘驛同朝完
善之區人民惶亂邠長門戶空虛喬松年身任陝撫責無旁貸當
此回捻交熾勢甚危殆何以並無一字奏報實屬不知緩急著喬
松年星速派兵馳赴邠長一帶妥籌防勦以固藩籬應如何分路
勦辦杜其與捻匪勾結之處著該撫相機布置並聞雷正綰有被
回匪擁去復行送回情事著該撫一併查明將近日軍情據實奏
報毋得一味顛預致負委任回匪既竄大荔等處晉省防務又形
喫重著趙長齡督飭臬司陳湜整頓水陸各軍嚴密備禦毋令闌

入晉疆將此由六百里各諭令知之尋喬松年奏據委員程維維等稟稱回逆圍攻秦昌時雷正綰自帶親兵數名出營探賊突遇大股猝至遂入洪家堡固守次日賊退始行回營並無被擄之事報聞○諭勞崇光奏分路進剿迤西請催各省協餉並收復鎮雄州城擒斬首逆各一摺逆匪杜汶秀盤踞大理蹂躪迤西一帶久稽顯戮勞崇光抵省後卽與馬如龍商議進剿見派參將楊振鵬等分南北兩路進兵歸馬如龍節制均已次第啟程馬如龍亦親督兵練前進各營同仇敵愾踴躍從公深堪嘉尙仍著勞崇光檄令馬如龍督率諸將奮勉圖功務將杜逆黨與悉數殲除廓清疆圉惟師行餉隨甚關緊要滇省地方彫敝餉需萬分難籌此次大舉西征所需甚鉅若餉項不繼難望士飽馬騰本日已諭令崇實等各將應解協餉趕緊解滇以資接濟自不至停兵待餉中道而

廢該督當隨時激勵兵練迅奏膚功以副委任鎮雄州城見已收復首逆均擒獲正法岑毓英勦辦賊匪奮勇得力業將該員超擢藩司以示嘉獎此時天氣融和正可乘勢進兵勦辦豬拱箐苗匪勞崇光卽飭該藩司相機進取毋失機宜將此由六百里諭令知之○寶授岑毓英雲南布政使

由進南道遷

○予雲南殉難知州林森

棠陝西殉難縣丞王思孔祭葬世職○壬午諭內閣御史阿凌阿奏參疆臣驕妄請旨嚴飭一摺據稱曾國藩不肯回兩江總督本任仍刊用江督字樣關防復欲以散員畱營並已回徐州又不接印等語曾國藩公忠謀國勳望素著且時以盛滿爲慮屢次陳請開缺並以辦捻無功自請量加譴責註銷侯爵謹畏出於至誠朝廷念其前功且籌李鴻章餉糈亦極緊要是以仍令回兩江總督本任該督復請畱營自效以免避勞就逸之嫌至所刊江督木質

關防係在河南境內行營所用其時並未開兩江總督之缺亦尙未折回徐州見已恪遵諭旨受篆視事是曾國藩本無驕妄情形該御史不查明原委率以臆揣之詞列諸彈章迹涉任意攻訐此風斷不可長原摺著卽擲還○諭軍機大臣等穆圖善奏官軍連奪要隘見移營剿辦並請景廉襄辦一切各摺片楊汶智股匪經官軍剿敗勢已窮蹙向鹽固一路竄去馬生彥一股仍踞半箇城地方靖遠鎮番及中衛黃河兩岸肅清該將軍擬將中衛大營移過河南甯安堡駐紮以杜該匪回竄卽著體察情形妥籌布置見在慶涇被困已久亟須撥兵救援昨有旨令穆圖善統率所部速赴涇陽卽著酌帶兵勇迅赴涇慶一帶節節掃蕩殄滅回氛毋令與陝捻勾合致滋貽誤甯夏地方緊要必須得人鎮守方可無虞仍著全順護理將軍印務毋庸隨同前往穆圖善移師東上甯靈

地方不能兼顧卽著楊岳斌慎選賢能守令遇有漢回交涉事件
秉公酌辦寬猛相濟毋得稍存偏袒致生事端哈密辦事大臣景
廉著准其暫畱穆圖善軍營襄理軍務俟軍事稍鬆卽飭速赴新
任不得藉詞逗畱將此由六百里諭令知之○諭成祿奏肅城未
下後路竄匪突至情形日緊並請撥兵援應各摺片肅州一城圍
攻日久迄未能克成祿督率無方殊屬疲玩見在東路竄匪擾逼
高臺圍攻城池若不趕緊剿除官軍必前後受敵勢不能支成祿
當振刷精神督率兵勇先將高臺賊匪殄盡以清後路並著剋期
攻拔肅城毋得再事遷延致生他變肅城攻克後整頓軍旅料理
出關見在該營兵力甚單著楊岳斌迅速多撥兵勇數營馳援肅
州不可稍分畛域致省西一路又形糜爛將此由五百里各諭令
知之○諭吏部罷斥各員保舉捐復概不許仍發原省○癸未工

部右侍郎魁齡等奏遵旨查探山西水源查得昆明湖來源出自玉泉玉泉之水實借助於香山櫻桃溝兩泉擬請力加疎濬節節導引停蓄於昆明湖中待其積長增高自仍循故道入長河以達京城請 欽派大臣覆勘修理得旨著卽派魁齡于淩辰王維珍文碩前往估修○甲申諭內閣御史張盛藻奏天文算學等事宜歸欽天監工部毋庸招集正途學習一摺前據總理各國事務衙門奏請設同文館專用正途科甲人員學習天文算術並擬章程六條呈覽當經降旨依議茲據張盛藻奏科甲正途讀書學道何必令其習爲機巧於士習人心大有關繫等語朝廷設立同文館取用正途學習原以天文算學爲儒者所當知不得目爲機巧正途人員用心較精則學習自易亦於讀書學道無所偏廢是以派令徐繼畲總管其事以專責成不過借西法以印證中法並非舍

聖道而入歧途何至有礙於人心士習耶該御史請飭廷臣妥議之處著毋庸議○河南巡撫李鶴年奏帶兵暫駐許州飛飭宋慶和機進剿得旨該逆蹤既敗竄楚豫交界地方卽著該撫督飭宋慶等軍迎頭剿擊儻再任令闖入惟該撫是問近日賊情仍著隨時確探具奏○改丁憂塔爾巴哈台參贊大臣德興阿爲署任仍幫辦新疆北路軍務並賞治喪銀五百兩○是月蠲免浙江仁等等六場被擾上年竈課並展緩橫浦浦東二場舊欠錢糧展緩直隸開州等二十五州縣被水被旱被雹災區新舊額賦山東濟甯等五十一州縣暨德州等四衛東平所屯莊被水被旱被蟲被雹被擾上忙額賦

東華續錄

同治六十二

臣王先謙敬編

臣張式恭恭校

二月乙酉朔諭軍機大臣等鮑超奏官軍連日追賊屢獲全勝一摺鮑超一軍自楊家澤大捷後連日躡剿由鍾祥至豐樂河一帶追殺五晝夜復斃賊一萬數千名生擒四千餘名救出難民二萬餘眾該提督勇於立功所向克捷實爲奮勉惟賊數不下十萬鮑超旣已與賊相持自不能舍而之他該逆見由泌陽桐柏竄去鮑超若已追賊入豫著卽整隊前進會合豫鄂諸軍將此股全行殄滅並著曾國藩李鴻章酌度軍情如任賴股匪鮑超一軍足能蕩事卽令該提督暫紮鄂豫之交先將此股辦竣儻賊蹤東竄已遠卽檄令該提督仍遵前旨迅速入秦軍情旦夕變遷朝廷不爲遙東華續錄

同治六十二

十一

制曾國藩李鴻章務當權衡緩急統籌大局不得置陝事於膜外
陝省兵力不厚如劉松山再有挫失事勢將不可問曾國荃於湘
鄂諸軍毫無調度糜餉老師又於鮑超一軍援鄂援陝朝令夕更
茫無主見鮑超雖疊獲大勝而曾國荃所部各軍竟如坐視儻再
不激勵將士振刷精神致援陝之軍日久爲賊牽掣或陝事因之
日壞該撫豈能當此重咎耶此時劉銘傳等軍均在鄂境著譚廷
襄曾國荃督飭諸軍躡蹤追剿並著李鶴年飭令宋慶等會同湘
鄂等軍將該逆就地剪除迅速竣事毋令再行紛竄貽誤戎機將
此由六百里諭知曾國藩李鴻章譚廷襄曾國荃李鶴年並傳諭
鮑超知之○諭喬松年奏陳近日軍情並同逆竄陝派兵剿辦情
形一摺張逆在秦渡鎮一帶糾賊抗拒劉松山等軍併力進擊已
移營逼近賊巢而甘省逆回突由宜君竄及耀州蒲城等處喬松

年派令總兵劉厚基副將何玲必各軍從同州臨潼兩路分投截
剿著卽嚴檄劉厚基等實力扼堵毋任此股賊匪與捻股合併肆
行蔓延其長武大荔各境亦有回逆竄擾此股賊匪恐非宜君同
夥究係由何處竄至據實察覈具奏所稱庫克吉泰德興阿前隊
已抵朝邑該處近連大荔當可乘機掩擊惟該將軍所部僅有馬
隊一千該撫自當酌派隊伍交庫克吉泰合力堵剿以厚兵力蒲
城富平一帶賊復遠颺仍著飭令劉厚基一軍跟蹤追剿毋令喘
息陝甘交界處所回匪屬集終恐句合捻逆牽掣官軍左宗棠未
到以前喬松年責無旁貸務當振刷精神激勵諸軍實力防剿毋
得貽誤事機陝西情形緊迫左宗棠務須迅籌入關以資督剿劉
松山一軍近日曾否接仗仍著屬令穩慎進攻以期節節掃蕩大
荔與晉省僅隔一河並著該撫咨會趙長齡妥籌防範毋稍疏虞

將此由五百里各諭令知之○予江蘇陣亡總兵官易華元湖北陣亡總兵官章茂等祭葬世職○丙戌諭軍機大臣等李鶴年奏任賴股匪北竄豫境催調各軍躡擊一摺鄂捻竄至楚豫交界之湖陽涇宋慶由唐縣拔隊迎截在魯岡東南獲勝賊匪大股由棗陽北竄唐縣復經宋慶催軍追至桐柏縣屬之平氏鎮西南續獲勝仗斃賊甚多賊已捲隊東奔該逆在鄂省被鮑超疊次懲創勢必不敢回鄂見已由豫省南界向東狂奔竄突靡定曾國荃辦理鄂省軍務數月以來竟未能就地殲除今又縱令竄入豫境自問將何以對朝廷著卽速催鄂境各軍赴豫助剿並著曾國藩李鴻章迅調湘淮諸軍迎頭攔截斷其趨向東北之路光固一帶門戶洞開曾國藩等當趕緊派軍扼守李鶴年亦當派兵會同扼截並飭宋慶盡力窮追賊騎飄忽異常著英翰閻敬銘丁寶楨迅速督

飭將士嚴密扼截妥籌布置毋令賊蹤闖入本境晉省完善之區
趙長齡當豫籌布置不得以賊蹤尙遠稍形疏懈陝洛閩鄉靈寶
一帶並著曾國藩李鴻章李鶴年分撥諸軍馳往堵截以防捻蹤
折向西竄將此由六百里諭知曾國藩李鴻章譚廷襄曾國荃英
翰李鶴年間敬銘趙長齡並傳諭丁寶楨知之○諭前據李鶴年
奏收撫降眾桂錫楨畱營剿賊原係解散逆黨暫時權宜之計見
復據該督撫奏稱派令帶隊剿賊自屬示以不疑惟桂錫楨性情
狡猾當隨時畱心防範見在是否改邪歸正卽著李鶴年察看遇
便奏聞毋稍大意將此諭令知之尋奏遵查上年賊撲河干係桂
錫楨先期告知朱慶得豫爲之備是以令帶馬勇百名至其性情
狡猾雖經歸正究屬不敢深信曾密諭朱慶隨時察看仍當密加
訪查隱爲鈐制報聞○丁亥諭內閣鄭敦謹奏據實陳明並自請

議處一摺前任湖廣總督官文提用竹木商捐餘款致送胡家玉等夫馬費用時該前撫尙未到任此外致送何人均未與聞惟官文動用捐款致送過客該前撫到任後未能查出究有失察之咎鄭敦謹著交部議處尋譚廷襄奏據官文查明公商提取竹木捐款係前任巡撫吳昌壽任內之事上年登覆文內繕寫鄭敦謹名係屬一時誤記懇爲奏明更正得旨吳昌壽著交部議處官文繕寫錯誤著一併交部議處○命兩淮月解銀二萬兩濟陝西軍餉○戊子以溫葆深爲左副都御史由宗人府府丞遷○翰林院侍講學士夏同善以道路傳聞有將幸惇親王第傳集梨園之事疏請停止諭曰前傳旨於本月初五日奉兩宮 皇太后詣惇親王府第神殿前行禮所以循舊章而展懿親斷無傳集梨園之理朕念典方殷日存寅畏何至以耳目嗜好爲天下先如惇親王果有傳集

梨園之事著卽撤去○己丑 上奉 慈安皇太后 慈禧皇太

后幸惇親王第○諭軍機大臣等譚廷襄曾國荃奏霆軍追賊西
上鄂軍扼守唐白河堵剿獲勝餘賊由棗陽竄豫一摺鮑超一軍
追賊獲勝唐協和又敗賊於兩河口等處賊向豫境桐柏一帶奔
竄見在鄂軍唐協和豫軍蔣東才淮軍劉銘傳均已先後追到著
曾國藩李鴻章李鶴年督飭各軍前截後追毋任再有竄突譚廷
襄曾國荃仍當派軍出境追剿不得稍分畛域鄂省水陸各營或
迎頭截擊或躡尾力追亦有微勞足錄著譚廷襄曾國荃擇尤酌
保毋許冒濫此次賊入鄂境曾國荃謂可痛殲於山嶺水隈之際
卒任該逆東西奔竄仍復逸出豫疆辦理毫無把握該撫自請議
處實屬咎有應得曾國荃著交部議處以示薄懲另片奏郭松林
受傷甚重請准回籍養傷等語郭松林著准其回籍養傷一俟傷

病就痊卽行咨調來營將此由六百里各諭令知之○以賊逸出境鎬曾國荃二級畱任○予湖北陣亡提督曹仁美等祭葬世職○庚寅李鴻章奏據豫省探報捻股向棗陽直趨東北竄至桐柏泌陽交界之平氏鎮勢已東趨淮湘各軍均已深入楚境一聞該逆竄豫當卽追躡北來而軍行斷不及賊行之速臣已檄調臬司潘鼎新由濟甯赴豫之尉氏扶溝擇要暫駐臣擬於二月初三日親督總兵劉士奇所部自徐州啟行先由歸德至周家口駐紮如途次賊警漸近卽在歸德暫駐相機調度河南撫臣李鶴年兵力本單臣部各軍在鄂數月遠役疲乏急切未能趕到銘樹兩營新挫亦須休息整頓目前別無可調之軍曾國藩前檄鮑超緊躡任賴一股凡在開封以西如南陽許州汝甯境內均與之縱橫追逐如任賴至汝州河陝等處亦跟蹤西行實屬切中事機應令鮑超

迅督所部由豫西兜擊俟臣部各軍抵豫後再由豫之東路兜擊
惟豫中地勢平曠無險可扼賊又善於避兵剿辦殊無把握東徐
一帶除防運各營外竟無一枝游擊之師若該逆乘虛闖入臣仍
須派兵往來追剿不敢稍涉疏虞 上諭軍機大臣等任賴股匪
竄入豫境桐泌一帶勢必日向東趨李鴻章見調潘鼎新一軍由
濟甯赴豫省之尉氏扶溝等處暫駐著卽飭令迅速拔營擇要扼
截不可遲延致落賊後該大臣見由徐州督兵西進著於歸德周
家口相機駐紮就近調度湘淮各軍多聚鄂境李鴻章務當檄令
迅速折回豫省東路探賊所向迎頭繞截其陝汝等處亦須籌撥
兵勇扼要嚴防以杜賊蹤折趨陝境毋稍疏忽將此由五百里諭
令知之○諭吳棠馬新貽奏遵勘浙省海塘要工籌撥款項分別
工程辦理一摺浙江海塘工程浩大值此經費支絀之時若一時

悉行興辦必致有名無實自應循照舊章分別最要次第辦理吳
棠等以堵禦缺口之柴壩爲最要保護殘損石塘爲次要擬每年
撥定銀八十萬兩佐以海塘捐輸次第興修此亦就目前情形而
論惟所築柴壩趕鑲外埽建復坦水各工不過暫時堵禦潮汐將
來仍需興建石塘馬新貽當通盤籌畫使見辦各工堅實穩固石
塘興建後即可以保護塘身則此次辦理各工錢糧不至虛糜而
於將來有益若止爲目前一時之計則日後興建石塘仍須多費
帑項未免漫無規畫馬新貽既知以十年爲期諒能籌畫及此海
甯塘工見在止辦有二成馬新貽飭令酌加錠錫自當益臻堅固
聞道光年間帥承瀛在浙江巡撫任內修理海鹽石塘最爲精密
歷久不壞卽著飭令在工各員仿照辦理儻此次海甯塘工辦理
不能經久必將承辦各員賠修治罪決不寬貸海塘用款雖繁歷

屆辦理銀數皆有案可稽見卽工料較昂何至七八百萬該督撫等不可任聽屬員張大之詞稍存畏難之心是爲至要吳棠另片奏降調道員陳璘請畱浙差委等語陳璘人旣明幹著准畱於浙江辦理海塘工程交馬新貽差遣將此由四百里各諭令知之○鑲白旗蒙古副都統孟保疏進繙譯醒世要言命武英殿印頒八旗各學○辛卯諭軍機大臣等楊岳斌奏哈密失守請飭催成祿出關伊勒屯奏巴城危急請飭催援兵及籌撥月餉各一摺成祿一軍前已疊諭剋期出關止因肅州無兵接替遷延年餘見據楊岳斌派令王仁和黃祖淦兩軍前往成祿自無牽掣之虞著卽懍遵前旨迅速出關先行克復哈密再候大兵雲集相機進剿毋許再有藉口致干重咎巴里坤餉絀兵單情形甚可憫念該處兵民於困苦之中尙能堅守洵屬難得若不亟籌接濟必致貽誤大局

著自本年正月爲始每月撥給銀六千兩卽於各省解到新疆餉銀內由福興桂成提解烏理雅蘇台交德勒克多爾濟轉撥毋稍短缺此次伊勒屯請領正二兩月餉項並著德勒克多爾濟照數撥給以資接濟巴城關繫甚要李雲麟諒亦籌及其應如何援救之處卽著酌量辦理伊勒屯原摺著鈔給李雲麟閱看將此由六百里各諭令知之○諭楊岳斌奏哈密失陷請催成祿出關並請飭穆圖善暫緩東行各摺片前據訥爾濟等奏稱哈密失守疊經諭令成祿出關並諭楊岳斌添派兵勇前赴肅州以便成祿交替西行本日復諭令成祿督率所部出關成祿啟程後肅州兵力益單不敷攻取著楊岳斌遵奉前旨迅卽添派兵勇歸併王仁和黃祖淦統帶速圖攻拔肅城毋稍遲緩慶陽被圍日久勢甚危急前經疊諭穆圖善移軍東援見在甘省回匪又復竄擾陝境之耀州

三原宜君同朝等處捻股竄踞盤鄂勢將與回匪句合陝疆兵力
甚單軍事益急著穆圖善斟酌陝甘兩省情形先其所急如不能
親行援陝卽著分兵東顧先解慶陽之圍仍駐防陝甘之交以杜
回匪東竄陝境西路防兵力甚單薄周顯承又復陣亡著楊岳斌
迅撥重兵扼截涇州等處毋任回匪續竄陝境前據林壽圖奏稱
雷正綰被捉放歸是否實有其事著楊岳斌確切查明毋稍隱飾
平固一帶軍情仍著隨時具奏將此由五百里各諭令知之○予
甘肅陣亡副將錢葆恩殉難知縣宋繼昌等祭葬世職○壬辰以
時疫流行命太醫院擬方藥發五城散給○癸巳諭軍機大臣等
英翰奏援陝官軍啟程日期並派兵在商固迎剿一摺郭寶昌一
軍業於正月二十四日拔隊入關任賴等逆已由白雀園一帶竄
過坡陂河盤踞英翰已飭黃秉鈞等馬步各軍前往迎剿並令程

文炳等自商城葉集兩路同進並令同知趙濟川等分守三河尖等處布置均尙妥協著卽督飭各軍探賊所向痛加剿洗毋任深入爲患如賊趨渦陽一帶著該撫親統勁旅迎剿各軍接仗情形並著隨時馳奏以慰廑繫另片奏請將部駁郭寶昌留營之案查銷等語郭寶昌此次援陝尙爲迅速著准其留營效力所有部議郭寶昌不准留營之案卽著撤銷將此由五百里諭令知之○諭喬松年奏雷正綰擊賊獲勝並請調軍兼顧西路一摺回逆由泰昌撲雷正綰營分竄涇州邠州一帶經雷正綰於正月十九日督軍苦戰將泰昌等處踞賊擊退著喬松年飛咨雷正綰乘勝進攻務將此股逆匪就地殲除毋令再肆蔓延慶陽甯州賊蹤徧地且有另股分擾邠州及邠州之長武若該逆悉數南竄剿辦更形棘手前有旨諭令庫克吉泰德興阿就近躡剿大荔等處回逆見在

西路軍情更緊卽著該將軍等統率所部由邠長大路前赴涇州與雷正綰各軍合力夾擊如賊已南竄卽著迎頭攔截掃蕩賊氛三原等處之匪著喬松年檄飭劉厚基等分投追剿擒逆近竄何處劉松山等軍是否業已接仗著該撫隨時奏報將此由六百里各諭令知之○乙未諭軍機大臣等庫克吉泰奏帶兵追剿擒匪一摺擒匪由秦渡鎮鄠縣一帶竄擾郿縣庫克吉泰見由同州派兵馳赴西安著於到省後與喬松年商度情形會合劉松山先行追剿惟回氛業已逼近庫克吉泰未便久畱陝省著酌度形勢遵奉前次諭旨馳赴涇州一帶會合雷正綰進剿並扼要防守以杜甘回續竄陝境毋得遷延貽誤將此由六百里各諭令知之○諭左宗棠奏籌擬購練馬隊請免馬稅並請調喜昌赴營各摺片左宗棠見在督兵剿辦擒回必須先練馬隊以資得力吉林所屬地

戶獵戶平素習騎耐勞火槍有準頗屬可用著富明阿德英於旗
民臺站各丁內挑選槍馬嫺習年力精壯礮手二千五百名並購
辦鞍韉三千盤作爲六起每起編成五札蘭並著德英於通省實
缺協佐領內揀委得力管總並於實缺及卽補防務驍騎校官內
選派札蘭正副各官權爲管帶以資約束每馬隊百名另募長夫
四十名所有挑選事宜卽由德英專辦並著富明阿飭令地方各
員幫同辦理務期迅募足數不可推諉遷延致滋貽誤所需戰馬
三千匹著裕瑞於張家口各處如數購買務擇口輕臚壯之馬精
益求精不得以疲瘦老羸充數如張家口各處一時不敷採買卽
著裕瑞移咨福興桂成在歸化城就近精爲選購足數統由裕瑞
親爲驗別毋許稍有含混此項馬匹俟吉林所募礮手行過京師
時由裕瑞解交該營總驗收轉解左宗棠軍營其應需鞍馬價銀

及選募徵手經費卽著富明阿裕瑞於該處庫項暫爲劃撥由左宗棠解還歸款如不敷撥給卽著戶部先行籌撥於山西協甘月餉項內提撥歸款經過地方馬稅均著免其交納吉林佐領喜昌見在告假回旗著富明阿飭令於假滿後統帶新募馬隊仍赴左宗棠軍營聽候差委將此由五百里各諭令知之○諭據左宗棠奏湖南布政使兆琛素不得力諱敗爲勝虛糜餉項及各省捐輸請飭湖南撫臣將該軍分別撤減另擇勇幹大員代其統領以收餉節兵精實效各等語兆琛援黔之軍屢報勝仗是否兆琛有諱敗爲勝情事抑或李元度等所報不盡可信該藩司雖由李瀚章派往而該撫受恩最重若稍涉回護致使軍餉虛糜黔事無益何以自安著卽查明據實奏聞並著酌量減撤或另派得力大員統帶以收實效劉崐業已啟程卽著於接篆後酌度情形妥籌辦理

庶於黔事有益將此由五百里各諭令知之○丙申 上奉 慈
安皇太后 慈禧皇太后幸恭親王第○諭軍機大臣等劉長佑
奏請將易州河間二軍營制略爲變通並將易州一軍改爲保定
一軍各摺片據稱遵化與古北宣化天津四軍悉照原議安營惟
易州河間兩軍各就近地安營以兩營駐易州三營駐保定仍爲
易州一軍以兩營駐河間三營駐正定仍爲河間一軍則增廣二
軍暫緩選練於撙節餉需籌備形勢似爲兩便等語所籌尙屬妥
協均著照所請行其易州一軍並著改爲保定一軍卽照該督所
擬於督標內增撥練兵六百名仍照原議擇地安營團操秦甯鎮
之兵卽毋庸挑撥以重守護劉長佑擬於三月初旬親赴各軍督
辦一切著卽就近來京陛見將此諭令知之○丁酉諭內閣通政
使司副使柏壽奏安定門外察有泉脈請挑挖河道以濬其源並

將城下被雨衝刷浪窩及早補墊各摺片著原派查探水源之工部侍郎魁齡等詳細查勘妥議具奏○諭軍機大臣等譚廷襄奏髮捻東趨飭軍分赴下游扼剿一摺譚廷襄曾國荃奏賊擾黃麻派中堵剿並查明任化邦賴汶沆等逆尙未殲斃各摺片逆匪經鮑超等軍擊敗之後雖受懲創馬步人數尙多任賴等逆相率逃逸見復由桐柏一路回竄鄂疆蘄黃麻羅防剿極關緊要譚廷襄已飭襄河水師下駛並調藍斯明等軍移紮潯口分布黃州麻城等處卽著嚴飭各軍防剿兼施不得令一賊一騎闌入腹地曾國荃督令彭毓橘等軍速赴黃麻痛加剿洗務須就地殲除毋許旁逸沿江地段並責令彭玉麟所派之王吉等水師二營與鄂軍梭織防禦皖之宿太英霍與鄂毗連英翰當督飭皖軍嚴密布置如賊蹤竄近卽迎頭奮擊以收夾擊之效李鶴年仍飭宋慶等軍嚴

防回竄相機進剿淮軍劉秉璋等營均入豫疆見在已落賊後著
曾國藩李鴻章檄令探賊所向分投兜擊此時賊勢雖肆奔突其
氣已衰曾國藩李鴻章等務須統籌全局一鼓殄除毋使其東西
狂竄疲我兵力將此由六百里各諭令知之○諭穆圖善奏回匪
勢窮乞撫籌畫布置遵旨前赴慶陽一摺馬生彥楊汶智悔罪投
誠情詞懇切並情願帶領馬隊數百隨同剿賊贖罪馬生彥等久
向官軍乞撫見在如果真心悔罪日內呈繳馬匹軍械自應乘機
收撫予以自新所有擇地安插事宜卽著楊岳斌委員妥爲辦理
慶郡困守無援殊形危殆穆圖善以楊汶智係陝西回酋爲同類
所畏憚擬卽飭令隨帶數騎前赴慶郡開導陝回俾各悔罪輸誠
藉以暫解城圍穆圖善一軍見旣進止兩難自不得不暫示羈縻
爲一時權宜之計惟楊汶智是否可用總當持以慎重謀定後動

母爲該逆所紿涇慶竄匪逼近陝疆應如何調撥兵勇嚴密堵擊以杜該匪東竄之處著喬松年穆圖善會商辦理穆圖善軍糧缺乏擬派員先行馳赴花定甯條梁一帶籌辦糧米著楊岳斌與穆圖善妥爲籌畫俾該將軍得以拔營前進迅解慶郡之圍將此由六百里各諭令知之○諭瑞麟蔣益澧奏剿辦惠潮嘉各州縣匪鄉殲除首逆一摺廣東土匪伏莽甚多經提督高連陞督率所部剿辦將黃陂徑口等鄉烏池合水岡等處及嘉應所屬並和平河源土匪次第鏟平殲斬首逆惠潮嘉水陸行旅漸通辦理甚爲得手該提督見因曹冲客匪猖獗經瑞麟等檄令移緩就急馳往會剿諒不難卽日蕲事高連陞見調甘肅提督飭令入陝曹冲客匪如一時未能辦竣卽著該督等另派將弁妥籌剿辦並將各路土匪淨絕根株是爲至要至此在事文武員弁不無微勞著歸入

查辦恩平五阮土客完竣案內擇尤保奏毋許冒濫將此由五百里各諭令知之○減廣東廣州等屬徵收米折銀十九萬兩有奇著爲令○戊戌諭內閣魁齡等奏覆勘石渠各工錢糧較鉅請暫緩辦理一摺前據魁齡等奏香山櫻桃溝兩處之泉擬力加疏濬節節導引可達京城請派大臣覆勘茲復奏稱香山等處工程估需錢糧過鉅恐虛耗國帑泉水未見流通等語西山一帶泉源關繫京城水脈該侍郎等奉命覆勘自當妥籌辦法以期於事有濟豈能畏難中止仍著魁麟等悉心籌商設法疏濬固不可稍涉虛糜亦不得意存推諉○李鴻章奏查鮑超馬步全軍約二萬人就目下賊情軍情揆之應令鮑超在鄂豫先辦捻股臣已飛咨鮑超自樊城拔隊由德黃山內兼程東下會同曾國荃所部分投截剿如賊趨皖省卽跟追入宿太境內如賊復由鄂回豫卽由信羅麻

黃出山會台各軍設法兜擊其東面六安英霍固始潁州一帶並

咨安徽撫

臣

英翰派兵堵剿至淮軍劉秉璋周盛波兩軍已由信

陽赴羅山劉銘傳一軍已抵信陽暫息李昭慶一軍由棗陽卽赴

羅山豫軍宋慶善慶各軍亦進抵羅山見在捻逆趨向未定擬令

霆軍與鄂軍專由山內兜剿淮軍與豫軍暫在山外扼剿

臣

卽啟

程赴周家口就近相機調度仍視該逆所向與各撫

臣

合力籌辦

迅殄寇氛又奏查劉銘傳剿賊向稱得力自四年四月後捻勢猖

獗尙賴劉銘傳督隊苦戰屢挫賊鋒該軍去年三赴山東兩入湖

北往來徐豫皖各境逐賊而行其步隊勞苦疲乏遠過他軍該提

督血性忠勇平素好戰輕敵屢經曾國藩與

臣

批令益加持重不

料尹澧河之役接仗過猛又因鮑超期會錯誤致有此失幸霆軍

援應奮勇再接再厲乘機大捷轉敗爲功該提督經此挫折之後

閱歷更增當倍穩慎據劉銘傳自請參辦應否量與薄懲或加恩暫行寬免以觀後效出自 聖裁道員劉盛藻統帶銘左軍先行敗退固屬眾寡不敵究竟督隊不力應請旨將劉盛藻拔去花翎撤銷勇號仍責令帶隊剿賊廣西右江鎮總兵唐殿魁此次力戰捐軀深堪痛惜總兵田履安副將李錫增胡衡章劉朝煦吳維章舉人陳允孚均歿於陣應併請飭部從優議卹唐殿魁並請照提督陣亡例從優議卹該軍新挫之餘臣已令其及時休養整練再圖大舉 上諭軍機大臣等見在張逆向西南竄逸而鄂捻東西奔突正資大枝勁旅追擊自當照李鴻章所請仍令鮑超在鄂豫之交相機追剿捻逆見竄麻城而鄂省東路空虛卽著鮑超由樊城兼程東下會同曾國荃所部分投剿辦儻賊趨皖境卽跟追至宿太一帶賊勢尙無定向該提督務當會合鄂豫各軍迅將任賴

全股就地殄滅以便騰出兵力西顧陝疆不可意存觀望致千重
咎並著曾國藩李鴻章妥爲調度譚廷襄曾國荃迅卽檄調各軍
併力夾擊毋令該逆得以飽掠遠颺六安一帶與麻城接壤英翰
亦應派兵嚴密堵剿不可稍涉大意見在賊蹤雖離豫境而回窺
實在意中李鶴年已飭朱慶由光山越境深追卽著飭令該總兵
會同淮鄂各軍實力剿辦不得稍分畛域李鴻章計程已抵周家
口居中調度自可洞悉機宜卽著嚴飭劉秉璋各軍相機進剿務
當申明賞罰鼓勵士氣痛挫逆鋒次第掃蕩劉銘傳於尹隆河之
敗進退失機其自請參處本屬咎有應得惟誤由鮑超未照約會
分路進剿致令劉銘傳駭退挫敗鮑超更不得辭咎姑念劉銘傳
果敢有素鮑超屢獲大勝過不掩功均加恩免其議處嗣後當益
加奮勉迅掃賊氛以副期望將此由六百里諭知曾國藩李鴻章

譚廷襄曾國荃李鶴年英翰並傳諭鮑超知之○諭喬松年奏劉松山等軍擊賊獲勝並覆陳回逆竄擾情形各摺劉松山等軍穩慎進紮漸次逼近賊營先將撲營之賊擊退並將呂兆集等處賊巢攻破復續破秦渡鎮花園集等處老巢殲斃解散甚多辦理頗合機宜見在賊已遁向盤屋難保不竄入南山著喬松年卽激勵將士催令劉松山等各率所部乘勝窮追毋任喘息漢中爲陝省膏腴之地且係川陝咽喉尤須妥籌兼顧庫克吉泰一軍著喬松年催令徑赴長武涇州一帶擊剿毋任甘回續行東竄三原咸陽之賊既經喬松年派兵擊退著卽飭譚玉龍劉厚基等分路儘力追剿務將回匪殄盡以清腹地雷正綰已在邱家寨獲勝仍著喬松年飭令各軍將士與雷正綰聯絡聲勢以期互相援應另片奏請催湖北餉銀等語陝省援兵雲集需餉浩繁雷正綰與譚玉龍

均皆缺餉所有湖北糧臺報解漢中銀十九萬餘兩著譚廷襄曾國荃飭令何璟陳丕業仍將此款解交林壽圖酌量支放原片著鈔給譚廷襄曾國荃閱看將此由八百里各諭令知之○命王榕吉來京以劉秉璋爲山西布政使

由江蘇按察使遷

未到任前以內閣侍

讀學士胡大任署理○予湖北陣亡總兵官唐殿魁等祭葬世職○己亥諭軍機大臣等前因哈密回匪西撲巴城情形緊急諭令李雲麟催令棍噶札勒參整齊蒙兵馳援巴城茲據李雲麟奏稱撥勇前往防一摺烏科兩城防務喫重棍噶札勒參所部蒙兵勢難移援西路該參贊見派張和所部勇丁在紅柳峽立營就近防守著卽飭令趕緊馳赴巴城援應速解城圍不得但顧北路本境稍涉遷延觀望其土爾扈特各旗北徙人眾卽著照李雲麟所指地方令其遊牧妥爲安插哈薩克人數眾多時思東犯李雲麟

當訓練厄魯特蒙兵嚴加防範毋稍疏忽將此由六百里諭令知之○以訥仁麟書俱爲內閣學士

訥仁由詹事麟書由太常寺卿遷

○以李鴻裔

爲江蘇按察使

由徐海道遷

○庚子諭軍機大臣等喬松年奏甘回竄

至鄜州請飭庫克吉泰等先剿鄜州之賊並催左宗棠赴陝各摺片另股回匪由三水東竄前股已至三原滋擾喬松年已飭劉厚基會同劉效忠等合擊復有大股逆回數萬句結土匪潰勇同時竄至鄜州境內段登雲一軍不能抵禦該逆已深入滋擾中部宜君邊境皆見賊蹤庫克吉泰德興阿已抵同州著卽帶兵趕赴鄜州毋庸再行進省致多紆折並著喬松年飭令劉厚基等軍迅將西路一股擊退移軍往鄜州協剿以厚兵力其由盤屋西竄郿縣之賊該撫當催令劉松山等躡剿仍須步步爲營未可稍涉大意另片奏陝省旣患兵弱尤患財殫請飭左宗棠攜銀帶兵到西安

徐圖規畫等語左宗棠見駐漢口慎重籌畫未便輕進朝廷亦深知其苦心惟見在陝省萬分緊急若非該大臣就見有兵力寬籌餉項迅赴西安調度恐軍心民心日形渙散設如喬松年所慮該大臣將來挽救更多棘手該大臣務當先其所急迅往鎮壓並以屏蔽晉豫斷不令連行入甘致礙該大臣種種布置鮑超一軍見已畱鄂剿賊湘淮諸軍亦俱到鄂後路尚可無虞該大臣卽酌度援應以紓屢念喬松年片一件著鈔給左宗棠閱看將此由六百里各諭令知之○廣安徽鄉試中額一名盱眙縣學額三名桐城望江涇南陵泗各二名懷甯太湖太平旌德懷遠各一名湖北東湖七名河南新蔡二名○壬寅諭內閣魁齡等奏覆勘泉河各工請分別緩急試辦一摺所有香山櫻桃溝石渠及各處泉河故道卽著魁齡等先行試辦並將香山等處封閉煤窯設法接採以裕

水源其積水潭十剎海並南北中三海各工並著照所請辦理一面行文欽天監卽行擇吉至所奏請將附近泉河稻田一律改種陸田並請酌減稅課妥爲撫恤之處著奉宸苑妥速議奏○癸卯諭軍機大臣等英翰奏稱賊蹤南竄派兵扼剿一摺捻逆被豫軍扼截折向真麻一帶其回竄英霍潛太實在忌中前已諭令英翰派兵扼堵見在該撫調派張得勝等軍擇要堵剿尙屬周妥卽著嚴飭該總兵等認真防剿如賊蹤深入鄂境或被擊他竄英翰務當視賊所向派軍追剿不可稍涉鬆懈鄂軍悉在西路此時計可東向迎頭攔截以遏狂氛著譚廷襄曾國荃督飭水陸各軍力籌堵剿不准徒託空言鮑超一軍前由樊城東向見在已否接仗殊深盼望若連捷之後縱賊奔竄俾得休養裹脅則剿滅又屬無期著李鴻章申明賞罰飭令各軍同心協力奮勉圖功毋任遷延貽

誤豫省防務雖鬆而回竄不可不慮著李鶴年飭令宋慶等軍相機防剿以杜賊蹤紛竄將此由五百里各諭令知之○諭前經疊諭庫克吉泰赴涇州一帶堵剿回匪茲據庫克吉泰喬松年奏會商先剿擒逆見辦情形一摺庫克吉泰一軍業已行抵西安所一馬隊已赴盤郿距郿州路遠未便再行折回著庫克吉泰卽日出省親赴盤郿會同劉松山追剿擒逆痛加戡戮郿州一路喬松年已派劉厚基一軍由富平耀州之間馳赴該處防剿惟陝境內地回匪尙未肅清而甘回大股數萬復勾結土匪潰勇同時竄至郿州段登雲一軍不能抵禦該逆已深入中部宜君邊境劉厚基兵力頗單恐未足敷剿辦庫克吉泰一軍未便專顧擒匪致令北路空虛著庫克吉泰喬松年斟酌情形如北路情形緊急仍著該將軍懷遵前諭折赴郿州將該處回匪擊退卽赴涇邠一帶堵剿不

得藉口剿擒致令顧此失彼庫克吉泰等另片奏見撥副將王其

發吳得勝兩營步隊歸該將軍調遣著卽照所擬辦理德興阿諒

已就痊著卽赴營迅圖會剿將此由六百里各諭令知之○以王

祖培爲內閣學士

由詹事遷

○以葆亨爲貴州按察使

由候補鹽運使遷

○廣

江蘇武進縣學額十名陽湖九名江西萬年十名○乙巳諭軍機

大臣等張凱嵩奏克復泗城慎籌善後並辦理鎮安太平等處土

匪各摺片鎮安竄匪闖入泗城經張凱嵩派總兵黃仲慶等馳往

剿辦疊克賊巢進薄泗城乘勝直奪關門大舉環攻羣賊自相驚

亂遂於上年十二月初七日將泗郡克復生擒賊首黃晚先鋒羅

大等三十八名辦理尙爲安速所稱賊首黃晚訊明確供已否正

法未據聲明同治元年三月間據薛煥奏逆黨黃晚勾通髮逆曾

諭薛煥密拏該逆附託洋人潛逃無蹤此次所獲之黃晚是否卽

係其人著該撫詳訊供詞具奏泗城雖已收復逆首吳亞終盤踞
鎮安難保不復萌窺伺著飭譚遠璉督飭朱騰偉認真接捕慎籌
善後至覃遠璉一軍攻剿鎮安等處土匪剿撫兼施疊平賊卡擒
斬甚多餘賊遁回歸順鎮郡南路肅清楊廷璵一軍攻剿太平一
路生擒首逆梁得培王之賢全股悉平剿辦均屬得手著張凱嵩
飭令覃遠璉楊廷璵等乘此軍威速將伏莽搜捕罄淨以靖邊圉
將此由六百里諭令知之尋奏訊明黃晚供詞該犯係鎮安土匪
並非外來之賊其非蘇省句通髮逆之黃晚似無疑義報聞○追
予故廣西右江鎮總兵官張樹珊於河南周家口建祠○戊申諭
軍機大臣等伊勒屯何琯奏哈密有隙可乘亟宜疏通餉道催兵
赴援一摺據稱拏獲哈密賊營漢回供稱各賊均得財偷走見在
賊勢稍分攻取甚易據李雲麟咨稱烏科兩城蒙兵散盡哈薩克

勢將內犯無兵可援巴城據棍噶札勒參咨稱營內兵馬器械均已齊備與李雲麟商議進兵請簡派委員協同棍噶札勒參急赴巴城救援疏通哈密糧道並請催成祿分兵出關救哈等語前據李雲麟奏烏科兩城防務喫重棍噶札勒參所部蒙兵勢難移援西路見派張和所部勇丁在紅柳峽立營就近防守當經諭令李雲麟飭令張和趕緊馳赴巴城援應速解或圍不得但顧北路本境見在巴城受困日深亟應派兵援救保全合郡生靈棍噶札勒參所帶蒙兵如可援應巴城著李雲麟與之會商妥籌赴援不得藉詞延宕儻巴城有失惟李雲麟是問伊勒屯何琯已調孔才等所招民勇赴巴著就見有兵力設法固守以待援軍不得稍涉疏懈伊勒屯等摺著鈔給李雲麟閱看摺內所稱肅州被圍甚急賊供安沙住紮兵勇防堵目下有說先取安沙又有先取巴里坤之

說近日肅州軍情若何安沙是否有賊股滋擾此項兵勇能否先
赴救援著成祿迅卽查明具奏仍遵前旨迅克肅州以圖出關會
師攻勦文麟已否至安西防堵並著催令該員刻卽赴任毋任逗
畱將此由六百里諭知李雲麟伊勒屯成祿並傳諭何琯知之○
己酉李鴻章奏臣於二月十二日進駐陳州府之周家口催調後
路軍裝糧餉緘商前敵各處軍情劉秉璋周盛波等馬步於初七
日追賊至湖北麻城縣據報賊已東竄巴河蘄水將由廣濟入皖
之宿松太湖劉秉璋等卽由麻城繞羅田山中進向英山鈔出宿
太嗣准湖北撫臣曾國荃咨函賊於初九十等日由廣濟蔓及黃
梅宿松邊界曾國荃擬移紮黃州飭鄂軍彭毓橘劉維楨等馬步
分爲兩路跟蹤東下臣計劉秉璋等陟山越領尙需數日又令李
昭慶王永勝等所部由光商進紮六安會同劉秉璋暨皖軍分投

擱擊總兵楊鼎勳帶所部八營由周家口馳往光州探明賊蹤會合進剿總期扼堵北竄猶恐賊速兵遲該逆復圖回竄並飛商安徽撫臣英翰多派弁兵赴英霍舒六擇要扼布頃奉諭旨令鮑超在鄂豫之交相機追剿臣復函商鮑超卽由南陽取道信陽羅山至光固一帶無論任賴竄往何處皖鄂何路有警卽行兼程進擊淮河下游自正陽關達臨淮較爲寬深皖省已派礮船巡扼將來該逆竄路不由霍山蘄黃回鄂卽由光固六鳳過淮臣見商鄂皖撫臣及各路統將設法兜圍如諸軍大集賊未遠颺臣再馳赴皖豫交界之處相機督辦上諭軍機大臣等賊由麻城東竄巴河蘄水見由廣濟蘄及黃梅宿松邊界曾國荃擬駐黃州督飭彭毓橘等分路跟剿李鴻章令李昭慶等由光商進六安會商劉秉璋等分投擱擊又令楊鼎勳馳往光州會師扼堵北竄所籌均妥著

卽督飭諸軍認真遏截並著英翰李鶴年各派勁旅擇要布置務期合力兜裹漸偏漸緊使該逆不得逞志方爲妥善淮河下游水勢寬深著曾國藩李鴻章多調礮船水師節節巡防以期周密鮑超一軍追剿正當喫緊之時遽請開缺調理未免近於要挾該提督素知大體所向奮勉何以亦沾軍營習氣仍著督隊由南陽取道信羅至光固一帶毋論任賴等逆竄往何處皖鄂何路有警卽行兼程進擊設法兜滅以奏全功並著李鴻章催令移營進紮母任藉詞延宕將此由六百里諭知曾國藩李鴻章譚廷襄曾國荃英翰李鶴年並傳諭鮑超知之○子湖北陣亡總兵官陳永康等祭葬世職○庚戌諭軍機大臣等譚廷襄曾國荃奏官軍追賊疊勝情形一摺捻逆由黃陂東竄繞至宿松邊境復回竄黃梅廣濟雖疊經劉維楨等追剿獲勝究未能大挫兇鋒曾國荃見在馳抵

黃州就近調度鄂皖邊境山阻水深值此春水方生渦淮並漲之時正可廣設方略與李鴻章英翰同心協力督飭各軍相機兜剿以期次第殄滅軍情變幻無常朝廷不爲遙制正以專其事權所請指示機宜實屬意存諉卸曾國荃責任統率何至不曉事體如此該撫務卽督令劉維楨等奮勉追剿毋許縱賊西竄並著英翰督飭水陸各軍會同夾擊李鴻章昨奏飭令李昭慶等由光商進剿卽著統籌全局剋期殄滅毋任遷延將此由六百里各諭令知之○閻敬銘以病免以丁寶楨爲山東巡撫潘鼎新爲山東布政使盧定勳爲山東按察使

由鹽運使遷

○辛亥諭軍機大臣等楊岳斌

奏病勢甚篤請派員暫署督篆並懇回籍調理各摺片情詞懇切覽奏具悉若再勉強挽留朝廷亦有所不忍惟穆圖善剿辦東路回匪並安撫已降之眾在在均關緊要一時能否遽赴省垣尙須

斟酌情形悉心籌辦不至顧此失彼方爲妥善楊岳斌俟穆圖善到省接署督篆後將一切情形詳細告知再議啟程毋得遽行回籍致誤公事穆圖善西赴蘭州後其東路防務關繫緊要馬生彥等甫經投誠尤當妥爲駕馭應派何人駐紮卽著該將軍酌量辦理毋得稍涉鬆懈楊岳斌又奏洮州回匪叛踞城池一摺回弁丁永安乘機復叛踞城抗拒實屬罪不容誅洮岷協都司丁永安著先行革職於擒獲後卽在軍前正法以昭炯戒洮州在河狄之西該處回氛徧地勢悍人多其應如何進剿之處著穆圖善於抵省後妥籌剿辦用副委任將此由六百里各諭令知之○諭前據左宗棠奏抵甘需時請暫畱楊岳斌在甘辦理本日據楊岳斌奏稱八旬父母患病沈重而該督病亦增劇請飭穆圖善暫署督篆覽其情詞懇切實不忍再行挽畱因令穆圖善馳赴蘭州暫署督篆

以便楊岳斌交替回籍惟穆圖善西赴省垣東路防務恐無人認真堵禦該大臣到陝後尙須經理關中回捻各匪方能赴任則東路防務實爲陝省門戶要區左宗棠此時計可啟程入關著於馳抵西安後斟酌情形相機辦理免致掣肘將此由五百里諭令知之○予甘肅殉難副將熊光明等祭葬世職江西殉難訓導劉崇鼎等祭葬世職建祠○壬子諭軍機大臣等喬松年奏陳近日軍情一摺甘省回逆分股擾陝經喬松年派令劉厚基等馳往剿辦柳林同官之賊向北狂奔竄出陝境乾州醴泉另股賊匪亦經劉效忠擊敗出境又有一股自靈臺竄赴鳳翔游騎已至岐山扶風該撫見飭譚玉龍等前往剿辦鄜州已無賊蹤令劉厚基一軍分駐宜君等處何路有緊卽向何處開拔所籌尙妥著卽督飭譚玉龍等認真迎剿鳳翔一股劉厚基隨機策應以資得力柳林同官

乾州醴泉之賊雖出陝境未受大創。匪股究向何路竄去。摺內未據聲明。嗣後奏報務將賊由何處竄入何路竄去。賊首何人。賊數多少。詳查具奏。不准疏略含混。致干咎戾。摺內所稱察看回逆股數甚多。仍必續竄入境。著督飭地方文武軍練。確探嚴備。毋令肆擾。郿縣之賊仍在齊家寨盤踞。劉松山見已移營槐芽鎮。遏賊之衝。著知照該提督步步爲營。見可而進。毋稍大意。該軍戰狀仍隨時詳細奏報。以慰馳廑。將此由五百里諭令知之。○諭成祿文麟奏會商馳赴哈密籌辦軍裝行糧。並請飭山西撥解餉銀。文麟奏哈密失陷。擬卽進紮安西。並勦辦高臺竄賊。獲勝各摺。片哈密失陷前。經成祿楊岳斌等疊次奏報。成祿等此次所奏籌辦招徠鎮撫等事。尙係未經失陷以前情形。文麟見擬製辦軍裝行糧。進紮安西。卽著趕緊布置。啟程惟目前哈密賊匪分撲巴里坤。甚急。

若待成祿出關會同進取誠恐巴城有失則哈匪之勢更張況昨據伊勒屯等奏據獲賊供稱哈城賊匪均得財偷走其勢稍分攻取甚易文麟當迅帶所部乘此機會攻取哈密其原派駐守哈密之兵勇三千名是否潰散並可沿途招集以厚兵力巴里坤被圍已諭令李雲麟派蒙兵星速往援若文麟上至哈城則賊匪前後受敵似可得手成祿久攻肅州不下殊屬疲緩務須力圖攻拔趕緊出關不得再事遷延致負委任哈密回主伯錫爾避往何處著文麟探明所向仍與聯絡聲勢會籌辦法文麟出關後軍餉極爲緊要著趙長齡飭藩司無論何款迅撥銀十萬兩解交烏里雅蘇台以備文麟派員迎提如一時籌運不及卽咨行德勒克多爾濟李雲麟等先在新疆協餉內提撥四五萬兩以應急需俟晉餉解到劃出歸款其指撥倉穀籌捐軍餉等事並著文麟咨明該地方

官辦理南山高臺等處竄匪疊經威儀營勇擊剿獲勝出力弁勇著文麟暫行存記仍飭該營勇等加意防剿將此由六百里各諭令知之○諭瑞麟蔣益澧奏曹冲匪勢猖獗出省督辦五阮客匪剿撫平定各一摺曹冲客匪經水陸各軍疊獲勝仗該逆以田頭爲門戶周廷瑞所部進紮冲金山徐圖逼近田頭竟爲該逆所乘以致傷亡將弁見在高連陞等軍進駐獅山洞口漸逼冲金左右兼擬分軍由唐美繞出冲金扼田頭後路使該逆首尾不能相顧所籌尙屬妥協蔣益澧見旣帶兵出省駐紮新甯浮石村居中調度諒不難督飭諸軍前後夾擊共拔堅巢該逆負隅已久本屬罪不容誅如果悔罪來歸亦不妨網開一面瑞麟蔣益澧當相機妥籌以靖地方至五阮客匪積年巨患雖一旦剿辦竣事而安插撫馭尤爲緊要著該督撫督飭王澍鄭紹忠等妥籌辦理務使永絕

亂萌客匪陳疇攜眷潛逃著飭該地方官密速查拏毋任漏網將此由五百里各諭令知之○諭本日據劉嶽昭奏勞崇光因病出缺已明降諭旨將張凱嵩補授雲貴總督郭柏蔭補授廣西巡撫未到任以前令宋延春護理雲貴總督吳昌壽前赴廣西署理撫篆矣雲南地方情形喫重著張凱嵩酌帶兵將星馳赴任廣西軍務未竣仍當妥爲區畫郭柏蔭著俟李瀚章到任後卽赴廣西均毋庸來京請訓劉嶽昭見擬由仁懷進駐大定一時未能抵省岑毓英又帶兵在外是以令宋延春暫護督篆劉嶽昭務當節節進攻取道赴滇以專責任並著先行奏報宋延春暫護督篆尤當振作精神認真整頓使漢回盡泯猜疑岑毓英見勦豬拱箐一股馬如龍見辦大理一股該護督悉當和衷商榷使竟全功不得存五日京兆之見用慰朝廷廑念邊陲之意將此由六百里諭知張凱

嵩郭柏蔭劉嶽昭並傳諭宋延春岑毓英知之○貴州官軍擊賊

獲勝解平遠州圍飭四川湖北各月撥銀五萬兩充餉○允張亮

基請於貴州省城建祠祀死事官紳兵民○予陝西陣亡參將裕

廉祭葬世職○予廣東陣亡副將賀國輝等祭葬世職建祠翁桂

秋等附祀○賑廣東嘉應州被擾難民○癸丑展普濟堂功德林

煮賑兩月○雲貴總督勞崇光卒贈太子太保子祭葬諡文毅○

以張凱嵩爲雲貴總督未到任前以雲南按察使宋延春護理以

郭柏蔭爲廣西巡撫

由江蘇布政使遷

未到任前以廣東布政使吳昌壽

署理○甲寅諭軍機大臣等庫克吉泰等奏進剿擒匪獲勝並請

催鮑超赴陝各摺片劉松山與安住等軍進剿銀金渠踞擒殺

賊甚夥攻克兩鎮該逆見退踞齊家寨一帶與鳳翔回逆僅隔一

河勢將併力勾結喬松年務當飭令劉松山等軍扼截渭河乘勝

進剿並著庫克吉泰德興阿督帶所部與劉效忠等相機合剿以杜捻回句合郭寶昌一軍計已入陝著喬松年趕緊催提以厚兵力鮑超剿辦鄂捻屢獲大勝甚屬奮勉所部將士亦頗出力著仍遵前旨會同曾國荃所部迅將任賴股匪殄滅以便騰出兵力西顧陝疆不可意存觀望並著李鴻章曾國荃妥爲調度迅奏膚功陝西情形喫緊前諭左宗棠就見有兵力先往鎮壓調度著卽酌量奏覆以慰馳厯將此由六百里諭知李鴻章左宗棠曾國荃庫克吉泰德興阿喬松年並傳諭鮑超知之○予陣亡參將劉福盛等祭葬世職○是月豁免山西平定等二十五州廳縣民欠倉穀蠲緩廣西凌雲等三十三州縣安平太平二土州被旱被擾上年額賦展緩江西義甯等二十七州廳縣暨九江衛被水被旱新舊額賦雜課山西臨汾縣歉欠舊欠額賦

三月丙辰諭內閣吏部奏遵議官文楷寫錯誤鄭敦謹等失察及動用竹木捐款等情處分一摺大學士前任湖廣總督官文前任湖北巡撫刑部左侍郎鄭敦謹均著照部議罰俸一年前任湖北巡撫廣東布政使署廣西巡撫吳昌壽著加恩改爲降四級畱任均不准其抵銷○諭軍機大臣等成祿奏擊退援賊高臺金塔解圍一摺肅州踞匪句來西甯援賊萬餘人圍攻高臺成祿派王蘭譜黃祖淦等軍馳援獲勝賊遂西撲金塔成祿復派寶型等與王蘭譜等會剿逆眾大敗分股散布九蓮寺等處復經寶型等奮力攻襲共斃賊五千餘人救出難民婦女二千餘名肅州踞賊探知官軍遠剿親率悍賊撲營楊永魁開鎗將偽帥馬汶彖擊斃寶型旋師夾擊共斃賊五六百人當此餉缺逆熾之時均能奮勉力剿尙屬可嘉目前肅逆援絕膽寒亟宜乘此聲威立圖攻拔著成祿

激勵將士勉益加勉以期迅奏膚功同膺懋賞將此由六百里諭令知之○安徽巡撫英翰奏捻竄皖省邊境擬向潛山太湖一帶迎剿得旨卽著檄令程文炳等迎頭截擊該撫務當親督將士會合鄂軍併力兜剿仍隨時咨商李鴻章妥籌調度○予甘肅陣亡從九品張際午等祭葬世職○丁巳諭軍機大臣等譚廷襄等奏賊勢上竄官軍先勝後挫見在布置情形一摺逆匪由蘄州上竄板橋等處經劉維楨彭毓橘兩軍分路追擊小有斬擒彭毓橘探知該逆由蘭谿董家河上竄親督各營躡剿遇伏失挫力竭陣亡此次彭毓橘之挫如各該營官有救應不力情事著譚廷襄曾國荃查明參辦該逆見由巴河上犯團風新洲奔竄黃孝一帶亟應力圖兜剿該署督等務當審賊所向檄令派出各軍會同淮軍劉秉璋等通力合作協同剿洗毋令再肆蔓延曾國荃見駐黃州卽

著就近將彭毓橘所部各營察看情形分別遣留鄂省賊眾兵單
勦辦恐難得手應如何抽撥勁旅赴鄂援應之處著李鴻章統籌
全局相機布置鮑超見由南陽取道信羅至光固一帶卽著懷遵
前旨無論任賴等逆竄往何處何路有警卽行兼程進擊一鼓聚
殲以副委任正在寄諭間據左宗棠奏捻中北隊一起江北河北
之人居多東北馬軍亦頗不少多係從前裹脅畏罪勉從請准令
悔罪歸誠等語捻中甘爲賊役者固屬法所難寬如果懼罪偷生
而能反正歸誠原不妨稍從曲貸著李鴻章譚廷襄曾國荃出示
曉諭以散該逆脅從庶更易於蕲事將此由六百里諭知李鴻章
譚廷襄曾國荃並傳諭鮑超知之○諭左宗棠奏督軍由鄂啟行
請散捻逆脅從聞中新刻竹枝詞請飭查辦各摺片陝省捻回合
援亟須知兵大員前往調度該督聲威素著一經入秦坐鎮自可

騰出陝省兵力併入前敵以利攻剿所有置造軍械及練兵籌餉各事宜即可於到秦後統籌全局次第經理庶將來肅清兩省計出萬全見在該督既已西行秦中自可無虞而鄂省賊眾兵單剿辦殊難得手鮑超一軍著仍遵前旨畱於鄂豫將任賴逆股剿滅再行移師入關前據英桂奏丁杰交出竹枝詞鈔錄呈覽匿名揭帖例應立案不行惟恐有挾嫌污蔑情事已諭令英桂吳棠面傳丁杰切實研究該督公忠共信公道自在人心也將此由六百里諭令知之○諭庫克吉泰等奏擒逆北竄各軍進剿情形一摺張逆竄踞齊家寨後句結逆回圖竄南岸經劉松山李祥和等軍直前進偪該逆遂由郿縣以西梟過渭北復經劉松山等軍跟蹤追擊逆股悉眾東趨提督譚玉龍等將馬賊擊退張逆率黨來援官軍力將賊圍衝破賊仍退踞於扶岐交界之益店一帶此次擒逆

雖被勦北竄而距回甚近難保不勾合西竄譚玉龍兵力甚單卽著庫克吉泰德興阿督同安住等所部馬隊會同劉松山等軍緊蹙前追喬松年亦當嚴檄譚玉龍等合力夾擊毋任勾合逆回深入爲害郭寶昌一軍計抵潼關著喬松年迅飭兼程馳赴會合攔截以殄兇氛並將會合擊勦情形隨時詳報以慰馳廛將此由五百里各諭令知之○諭兆琛奏官軍連破苗寨並苗逆分擾湖南沿邊州縣回軍截勦一摺苗逆自經官軍攻入頗洞退守寨塘寨滾等處經兆琛周洪印所部分路進攻連破苗寨屯卡其李元度一軍進逼荆竹園亦將盤架巖賊卡攻破該逆以楚軍深入擣其巢穴糾黨犯楚以圖牽掣擾及湖南沅晃黔會靖州各處雖經官軍截勦合勝而備多力分殊難制賊死命見在周洪印已將西防會剿之兵十三營陸續撤回肅清楚境再議進兵兆琛所部七千

人除分防思州青溪各隘外見存前敵及畱守邛城者僅四千人
是湖南援黔之師仍不過沿邊堵剿苟延時日若非迅籌添募安
能深入賊境擣穴殲渠兆琛見稟商李瀚章酌量增兵以資調度
卽著該撫迅速增募數營揀派得力將弁統帶交兆琛調遣以厚
兵力趙煥聯席寶田告假在籍見在楚邊有警並著李瀚章另募
勁軍飭該二員統帶分防邊境以便前敵之軍一意剿賊劉峴到
任後並著與李瀚章妥籌方略總期戰守兼籌毋致顧此失彼將
此由五百里諭知李瀚章劉峴並傳諭兆琛知之○予湖北陣亡
道員彭毓橘祭葬世職建祠提督羅朝雲等祭葬世職附祀並湖
南陣亡總兵官胡紹春等祭葬世職○戊午飭山西撥銀八萬五
千兩解烏里雅蘇台科布多○己未展五城煮賑兩月○庚申諭
軍機大臣等李鶴年奏馳赴周口與李鴻章會商軍務將善後馬

隊派往淮軍協剿張曜到營整練新軍一摺所籌尙妥善慶所部吉林黑龍江騎兵派赴信陽與劉銘傳一軍相合卽著李鴻章飭令劉銘傳妥爲調度俾馬隊相輔以成勁旅其月餉仍由豫省撥解張曜到營李鶴年擬令招募步隊十五營該撫當飭令嚴加揀選趕緊教練務使餉不虛糜兵歸實用以副委任所需洋槍軍火既經李鴻章借撥購買此等利器若非得人而用往往借以資敵尤須加意訓練以免疏失鄂賊距光商不遠著李鴻章激勵鮑超等迅速移營前進毋任遷延貽誤將此由五百里各諭令知之○王戍諭軍機大臣等張之萬奏捻逆由鄂竄皖見辦江北防守情形請催山東協餉各摺片任賴等股捻匪前由鄂省擾及皖疆宿松邊界昨據曾國荃奏見已折回鄂境蘄黃一帶惟逆蹤趨向靡定勢甚剽疾難保不復向宿太東趨全滁張之萬見商李朝斌酌

派兵勇備調並調朱光廷等分赴蔣壩衡陽黎城一帶水陸巡防
高郵運河口並湖面要隘亦經派隊嚴防布置尙爲周妥卽著照
所籌辦理儘兵力尙有不敷並著曾國藩酌量添調蘇省各軍前
赴淮揚協同防剿如捻逆回竄豫疆沿淮東下卽由曾國藩張之
萬將調防揚境各軍檄回北運河及成子河一帶併力嚴防毋任
東竄至山東應協清淮月餉自上年五月至今積欠甚鉅見在清
淮防務正當喫緊之際著丁寶楨將應解清淮協餉趕緊批解以
資接濟不得仍前膜視另摺奏請將額解河餉酌撥開單呈覽一
摺南河工需久無撥款接濟該處工段逐漸廢弛自應及時修補
著曾國藩郭柏蔭英翰將應解南河銀兩酌量撥解應用不得視
爲具文原摺著鈔給曾國藩等閱看將此由五百里各諭令知之
○諭總理各國事務衙門奏遵查朝鮮與俄人交兵情形一摺朝

鮮國上年十二月間有匪類渡江肆擾並俄人疊赴該處立界牌投書契各情朝鮮臣服我朝最爲恭順越界之禁定例綦嚴上年十月間既有中國人數百名渡江搶掠不過月餘復有匪類過三洞山邊之事恐係中國游民偷越爲匪此等不法匪類經朝鮮國官軍擊斃實屬罪所應得而中國亦當申明例禁認真查拏卽著富明阿富爾孫嚴飭沿邊各卡員弁晝夜梭巡遇有偷越赴朝鮮民人卽行嚴拏懲辦並著按照朝鮮國王來咨詳查覆奏不准稍涉含混其俄人築屋之處究在何處界牌境內並著禮部轉咨朝鮮國王據實登覆以憑考覈嗣後中國匪徒私越邊境赴朝鮮搶掠者該國不妨拏辦以遏亂萌見在朝鮮多事之秋不得不從權辦理以示體恤也將此各諭令知之尋富明阿等奏甯古塔佐領松恆稟報會同琿春防禦永祥在接界一帶細訪徧查實無游民

越界搬運朝鮮逃人財產搶擄滋事等情惟棘心河嚴桿河二處有朝鮮逃出千餘人結屋訊係因本國歉收越俄國界牌山到此所住之處並非應管界內但事關邊徼自應嚴飭各卡官弁嗣後認真密查以清疆域下所司知之○飭山東迅解清淮協餉○癸亥諭軍機大臣等鮑超奏傷疾增劇懇請開缺回籍一摺鮑超轉戰東南數省受傷最多朝廷素所稔知近因追賊五晝夜舊傷復發諒非捏飾惟該提督榮膺五等受恩至重朝廷畀以干城腹心之寄與尋常將領相待不同當此捻逆鴟張鮑超必深憤激況營中月餉供應艱難停兵糜餉該提督亦問心難安鮑超著賞假十日在營調理設值劉銘傳等軍追剿喫緊仍應嚴飭將領迎擊一俟假滿卽督軍奮剿以保數年之威望昨據左宗棠奏催該提督赴陝已諭知畱於鄂豫剿捻其調度機宜朝廷責成李鴻章辦理

而追剿迎擊惟鮑超劉銘傳兩軍是望著李鴻章曾國荃飭令各軍隨同進剿迅奏膚功同膺懋賞毋許遷延諉卸將此由六百里諭知李鴻章曾國荃並傳諭鮑超知之○諭喬松年奏近日軍情並段登雲所部潰擾一摺甘省大股回逆勢將盡與捻合左宗棠見已啟程著卽兼程前進與喬松年會商剿辦段登雲所部勇丁在鄜州劫獄擄庫該總兵旣不能禦賊又約束無方著卽革職不准畱營以示懲儆署知州田景瀛疏於防範著一併革職暫行畱任陝省軍政久弛左宗棠喬松年當申明紀律嚴定賞罰以挽積習所有滋事勇丁卽著嚴拏懲辦並將此軍勇丁應畱應撤酌量妥辦毋令從逆生事鮑超一軍前已諭畱鄂皖剿捻左宗棠帶兵入關後騰出陝省兵力合併郭寶昌劉松山兩軍計數目前分布該大臣當遵前旨坐鎮關中妥籌剿辦陝省探報多有爲從逆之

潰勇所誤該大臣等宜詳慎審察將此由六百里各諭令知之○
丁卯諭軍機大臣等穆圖善奏回眾呈繳馬匹軍械移軍東赴慶
陽並請飭山西撥籌月餉各摺片回目馬生彥等呈繳馬匹軍械
爲數不多雖據聲稱不敢藏匿究亦難於輕信著穆圖善再行酌
量情形妥籌辦理務使勿墮詭計以靖地方慶陽被圍甚急穆圖
善所帶馬步兵力不爲不厚著卽於行抵該處後奮力攻剿不許
稍有遷延其甯安堡地方關繫緊要並著楊岳斌抽撥一軍前往
駐紮派委委員點驗降回戶口辦理安插事宜穆圖善所陳陝回
不難收撫而難安插甘回未離故土反正較易陝回則田園廬墓
無存在甘擇地安插究屬時懷觖望各等語甚爲有見陝回人數
尙多被剿竄甘而地方瘠苦覓食無資其懷思故土亦屬至情雖
從前不無罪戾而盡數剿除亦非仁者之用心甘省土地磽瘠斷

難久容而陝省漢民積弊已深又恐不能相安左宗棠向來善於謀畫著卽察看民情地勢妥爲經理或令壯勇者隨營老弱者給以耕種俾得生聚安樂同爲率土良民喬松年身任地方亦著悉心咨訪認真辦理穆圖善移軍東向採糧較難陝省北山各州縣額徵糧石著喬松年飭令聽候該將軍酌量提用卽在陝省應解穆圖善月餉內折銀抵扣山西清水河倉穀卽可暫時停運著趙長齡仍按月撥解銀四萬兩以一萬兩解交甯夏三萬兩解赴穆圖善行營直晉官兵月餉該省久未撥解並著趙長齡迅籌撥解儻一時不能接濟卽著於甯夏所屬各州縣額徵糧石內提用以應急需而贍軍食將此由六百里各諭令知之○諭李雲麟奏民勇變亂辦理情形一摺李雲麟所募勇丁三營分防巴里坤因參將富貴營中被裁之勇潛與孔才營中勇丁勾結圍攻富貴營盤

於察罕同古並將官廠及札哈密遊牧附近牲畜搶劫李雲麟見
派蒙兵分紮烏隴古河等處著與奎昌明瑤相機堵剿並知照烏
里雅蘇台一體嚴防以固北路門戶前據伊勒屯何瑄奏調孔才
所部勇丁赴援巴里坤並稱李雲麟扣除勇營鹽菜銀兩以致勇
丁意存劫奪牲畜是李雲麟之措置乖方早兆釁端此時該勇既
經潰變伊勒屯等亦當慎加防範不可稍涉大意能將此項潰勇
酌量招集妥爲駕馭更可免意外之虞關外敦煌安西等州縣並
著成祿分兵往守以防潰勇東竄一面迅克肅州統兵出關進剿
毋稍遷延將此由六百里諭知李雲麟奎昌明瑤成祿伊勒屯並
傳諭何瑄知之○戊辰李鴻章奏任賴捻逆於二月十四五路由
廣濟黃梅竄近皖邊適藩司劉秉璋總兵周盛波等統軍由羅田
英山趕至太湖迎頭攔截侍郎彭玉麟復督師船駛往安慶江面

撫臣英翰所部亦分赴潛太英霍堵禦賊卽於十六七日由蘄州

蘄水回竄十八日鄂軍在蘄水六神港迎剿失利藩司彭毓橘等

陣亡湖北撫臣

曾國荃疊次函請派兵援剿臣部各軍先已飭往

皖境堵禦因檄令劉秉璋周盛波周盛傳等由宿太跟追入鄂兼

蔽皖省門戶李昭慶馳抵六安卽由商固折回入鄂楊鼎勳行抵

光州卽由光山入麻城相機攔擊東北兩路或較穩固惟捻勢西

趨鄂軍單弱自彭毓橘挫敗後賊卽蔓延黃岡黃陂腹地有回竄

德安之意鄂省西北極爲空虚鮑超久住樊城疊奉諭旨飭令追

剿任賴等股若就近由德安馳赴黃州迎剿最得機勢乃疊准鮑

超函稱傷病難支已奏懇開缺並請

臣

處派員接統該軍等語臣

查霆軍馬步人數甚多皆由該提督自行募練必須該提督統率

進剿呼應方靈

臣

處實無勇幹大員可以遴派接統可否仰懇

天恩俯念該提督宣勞最久鄂事正緊飭催力疾統軍由樊城徑趨黃州會同各軍迅將任賴捻股合力剪除再行賞假調理實於剿捻全局有裨臣仍就見有兵力與鄂豫皖各撫臣酌籌布置飭劉秉璋李昭慶等穩紮穩進協力援剿又奏提督劉銘傳一軍剿捻素稱得力自正月十五日安陸尹瀝河之役以猛進致挫戰將唐殿魁等陣亡臣飭暫駐信陽休養選將練軍以圖復振業已撥給樹字馬步六營併歸該提督統率惟所部馬隊尙單適河南撫臣李鶴年由許州來周口會商軍事臣稔聞副都統善慶歷在皖豫剿賊奮勇雖所部吉林黑龍江騎兵無多較之新募馬勇爲稍強面商李鶴年歸併劉銘傳調度四出援剿善慶月餉仍由豫省糧臺照舊撥解俟劉銘傳整練就緒無論捻竄何處或仍久踞鄂中再行督率馬步相機進剿上諭軍機大臣等捻匪見在蔓延

黃岡黃陂腹地有回竄德安之意李鴻章見令李昭慶等由商州
光山分道入鄂西北一路甚屬空虛前已疊次諭令鮑超奮擊嗣
雖賞假十日仍令督兵協剿該提督素稱勇往當此逆氛尙熾諒
不意存觀望著卽力疾督師由德安馳赴黃州迎剿毋失機會以
竟全功並著曾國藩李鴻章剴切開示毋任初終異轍以保勦名
而副期望將此由六百里諭知曾國藩李鴻章並傳諭鮑超知之
○諭英桂周開錫奏拏獲崇安逸匪見在辦理情形一摺崇安齋
匪黨與漏網甚多見經英桂等派員拏獲要犯王有材等多名分
別戮屍正法其餘各犯應卽迅取確供嚴行懲辦毋任狡展所供
逃逸各匪著按名嚴密查拏毋令聞風遠颺至愚民無知僅止喫
齋尙無爲匪情事自與從逆滋事者有間英桂等見已出示曉諭
勒令開齋予以自新所辦甚是惟當隨時稽察如有怙惡不悛者

立卽懲治以消後患見在崇安茶市方興恐有外來匪徒瀾迹乘間竊發英桂等已飭該管文武緝查卽著認真辦理另片奏擒斬各屬土匪情形等語福甯建甯所屬與浙江溫處交界一帶多有私梟糾搶復敢拒捕傷兵此等兇徒警不畏法若不悉數查拏必又爲地方之害英桂等已咨會馬新貽派員約期捕拏卽著隨時會緝不得有名無實閩省民風刁悍各屬匪實繁吳棠見已赴任著督飭屬員編查保甲實力整頓庶幾安良除暴綏靖地方以副委任將此由四百里諭知英桂吳棠並傳諭周開錫知之○命孫長紱畱京以文輝爲江西布政使王德固爲江西按察使

由補用道

遷

○予湖北傷亡參將于翼開等祭葬世職○己巳諭軍機大臣

等庫克吉泰等奏賊蹤東竄各軍追剿情形一摺捻股爲劉松山等追軍所阻全股向東北狂奔竄往醴泉一路鳳翔回逆亦同時

東竄據獲賊供稱該兩逆會商欲以擒逆竄同朝回逆犯省城使
官軍首尾不能相顧甘回何學德等股均將下竄陝省情形甚爲
喫重著庫克吉泰德興阿喬松年督飭劉松山等會師進擊毋任
句合分擾兼顧省垣門戶甘回股數眾多皆欲乘虛東犯著穆圖
善楊岳斌督飭雷正綰等認真截剿牽制賊眾毋任併力下注左
宗棠見已帶重兵入關計日可到西安卽遵前旨在省坐鎮酌度
何路喫緊迅卽添兵前往節節掃蕩務當統籌全局妥爲調度以
紓朝廷西顧之憂晉省完善之區該逆久生窺伺著趙長齡督飭
陳湜悉力嚴防不可稍涉大意將此由六百里諭知左宗棠穆圖
善庫克吉泰德興阿楊岳斌趙長齡喬松年並傳諭陳湜知之○
諭何瑄奏整頓兵勇進圖哈密一摺哈密自去年復失後巴城糧
道斷絕此次該總兵等勸捐招募勇丁合之官兵練勇共計三千

餘名派委千總芮林等管帶於二月十九日啟程進剿救援哈城
卽以誌通巴境糧道辦理尙爲奮勉惟須申明紀律穩慎進兵免
致見賊潰退其孔才所部勇丁前經與參將富貴營中裁勇勾結
圍攻營盤何瑄見調令赴坤作爲後路接應該大臣等當妥爲駕
馭以免意外之虞至巴城城守緊要賊氛密邇伊勒屯何瑄尤當
加意布置慎固封圍毋致顧此失彼變生肘腋是爲至要將此由
六百里諭知伊勒屯並傳諭何瑄知之○命戶部撥銀二十萬兩
修直隸開州金隄○庚午諭軍機大臣等張凱嵩奏黔苗越境滋
擾見籌防剿情形一摺貴州獨山荔波等處苗匪屢經竄入粵西
慶遠思恩境內分股滋擾疊經該處文武官紳督帶兵團迎剿均
有斬獲該匪敗退歸巢張凱嵩見擬聯絡鄉團以資防堵著卽督
飭文武官紳實力辦理仍一面籌調官兵相機進剿並著張亮基

派撥兵練與粵西官軍互相夾擊合擣苗巢迅掃賊氛慶遠距桂林較遠呼應未能靈便卽著張凱嵩咨令馮子材就近馳赴慶郡督率調度以期早行蕪事將此由五百里各諭令知之○辛未諭軍機大臣等前因捻逆肆擾楚豫等省諭令吉林黑龍江各派馬隊官兵一千名與神機營馬隊赴豫助剿茲據富明阿等奏酌撥馬隊赴豫並陳地方情形及見辦金夫流民各摺片吉林所屬地方遼闊額設兵丁頻年徵調已多存營之兵不敷分防富明阿等見擬抽派官兵五百名並挑給馬五百匹赴豫人數無多著再聽候諭旨所需此項兵丁馬匹整裝置備軍械等項請另撥銀二萬兩著都興阿額勒和布由盛京庫存項內先行如數籌撥俟該兵丁等啟程時由富明阿發給至吉林庫無存款前據富明阿奏請飭催欠解軍營餉需銀十一萬兩令戶部迅催各處趕解所請撥

解左宗棠籌調礮手等項銀七萬兩已諭令戶部迅撥計可陸續解到矣金廠散出流民見復聚集千餘人在琿春界北淘金恐其逸入俄人邊界滋事著富明阿富爾蔭卽飭派出協領各員聯絡地方紳團妥爲驅遣毋令潛行久住三姓甯古塔等處山內亦當實力接捕毋令金匪聚集總須設法解散擇地分別安插俾免竄越俄界別生枝節其竄至琿春西路之持械馬賊尤當就地迅速殄盡不可稍涉疏忽將此由五百里各諭令知之○諭李雲麟奏辦理債事請從重治罪並陳科城五不可居各摺李雲麟自幫辦北路軍務以來歷次條奏軍情朝廷深恐輕率債事訓誡再三乃該署參贊銳意邀功調集蒙兵民勇先後潰散遺失軍裝駝馬不可勝計今覽李雲麟所奏是該署參贊亦知罪無可追卽於軍前明正典刑亦屬情罪允當惟念新疆軍務辦理本形棘手李雲麟

冒昧從事與畏葸取巧者不同其罪雖可誅而其心尙可諒況能服罪輸情不敢欺飾自當量予區別本日已交部嚴加議處所請治罪之處著暫行寬免該署參贊惟當感激法外之仁於烏科兩城防守事宜會同德勒克多爾濟等和衷商酌妥爲布置毋使稍有疏失遇有緊要事件虛心體察不可徒事矜夸致負厚恩儻稍有貽誤決不再爲寬貸也懍之愼之將此由六百里諭令知之○免山西缺額糧銀○飭山西沿河州縣力行保甲○予廣西殉難知縣劉汝棠祭葬卅職加等○申諭各省被脅人犯悔罪來歸者概免治罪○壬申諭軍機大臣等譚廷襄曾國荃奏擒逆盤旋於麻蘄二黃官軍獲勝賊復上竄雲孝見在會剿各情形一摺賊眾在麻蘄二黃境內疊經姜玉順等軍擊敗多有擒斬左宗棠帶兵行至潯口亦麾軍追剿刻下任賴二逆上趨雲孝將由應城天門

以赴日口冀擾襄河南岸完善之區著曾國荃檄飭襄河水師節節上駛極力防範並整頓各州縣民團憑河固守以保要隘鄂軍三十餘營止可併爲一路見由孝感雲夢緊躡其後僅成尾追之勢不足以遏兇鋒鮑超假期屆滿自必督軍迎剿用收夾擊之效該提督何日拔隊啟行卽著趕緊奏報以慰馳繫不得任意遷延自棄前功致干重咎李鴻章已派李昭慶等率淮軍由麻城入鄂卽著催令鮑超一軍與之會合上下夾攻以紓鄂患曾國荃已由水路赴省著將見在軍情與譚廷襄妥商辦法視賊勢趨重何路卽行相機出省調度毋誤戎機陝西情形喫重左宗棠所帶之兵未能在鄂久延仍著懷遵前旨迅速入關調度將此由六百里諭知李鴻章左宗棠譚廷襄曾國荃並傳諭鮑超知之○癸酉諭內閣總理各國事務衙門奏遵議大學士倭仁奏同文館招考天文

算學請罷前議一摺同文館招考天文算學既經左宗棠等歷次陳奏該管王大臣悉心計議意見相同不可再涉游移卽著就見在投考人員認真考試送館攻習至倭仁原奏內稱天下之大不患無才如以天文算學必須講習博採旁求必有精其術者該大學士自必確有所知著卽酌保數員另行擇地設館由倭仁督飭講求與同文館招考各員互相砥礪共收實效該管王大臣等並該大學士均當實心經理志在必成不可視爲具文○乙亥諭內閣前因大學士倭仁奏天文算學博採旁求必有精其術者曾降旨令其酌保數員另行擇地設館由倭仁督飭講求茲據該大學士奏稱意中並無其人不致妄保等語倭仁見在旣無堪保之人仍著隨時畱心一俟諮訪有人卽行保奏設館教習以收實效○諭軍機大臣等林壽圖奏慶涇運道梗塞並雷正綰營募勇冒濫

各摺片甘回竄擾鳳翔圖與捻合慶涇餉道梗阻林壽圖所設轉運分局在乾州城內見在乾州被賊攻撲情形甚緊著喬松年迅即派兵援乾速解城圍左宗棠到陝後布置調遣各事宜自必與喬松年妥爲籌辦惟陝省良奸溷迹雷正綰營募勇素多冒濫該提督見派遊擊余萬明等赴漢中招募六營新勇著喬松年飭令確查精選並著左宗棠格外畱心免爲所誤林壽圖原摺片各一件著鈔給閱看將此由六百里各諭令知之○命大學士倭仁在總理各國事務衙門行走○予陝西殉難府經歷劉燮祭葬世職○丙子諭軍機大臣等蔣益澧奏統兵出省察看地勢匪情嚴密布置一摺曹冲匪勢猖獗蔣益澧帶兵出省親往督辦該匪擁眾來撲官軍迎截小有斬擒餘匪翻山遁去蔣益澧見派水師嚴斷接濟著卽嚴督各軍認真辦理如能將楊梓釗等招降令其潛爲

內應較易得手該撫務當斟酌情形剿撫兼施以期迅速肅事高連陞見在帶兵赴陝勇往可嘉俟有勞績定當優加賞賚著蔣益澧傳知該提督剋日遄征奮勉圖功以副厚望將此由五百里各諭令知之○丁丑諭軍機大臣等譚廷襄曾國荃奏擒眾西竄應城京山天門官軍疊擊獲勝李鶴年奏任賴股匪西趨張逆向東移動豫省兩路防軍布置情形各一摺擒匪分竄孝感之小河司等處經劉維楨等分道進剿各有斬獲該匪被擊後竄至烏路寺又擾及阜市等處趨向靡定曾國荃復赴德安調度著卽督飭水師礮船堵賊上竄並督陸軍緊躡追剿以遏狂氛惟上游扼截之師尙少勁旅鮑超素稱勇敢如已全愈著卽督隊前進儻尙須調養卽先派得力將弁會合鄂軍痛剿自爲後勁以竟全功何日拔隊啟行仍遵前旨馳奏以慰廑繫李昭慶等軍著李鴻章飛催拔

隊上行會師夾擊李鶴年所奏兩路軍情與譚廷襄等奏報略同
著飭令宋慶等整頓防軍以備邀截並令張曜新募之軍趕緊教
練相機調撥西路之防見派馬德昭前往閩鄉駐紮著督飭隨時
偵探賊情與陳湜等聯絡聲勢不得稍分畛域將此由六百里諭
知李鴻章譚廷襄曾國荃李鶴年並傳諭鮑超知之○戊寅諭內
閣前派大學士倭仁在總理各國事務衙門行走旋據該大學士
奏懇請收回成命復令軍機大臣傳旨母許固辭本日復據倭仁
奏性情迂拘恐致貽誤仍請毋庸在總理各國事務衙門行走等
語總理各國事務衙門公務關繫緊要倭仁身爲大臣當此時事
多艱正宜竭盡心力以副委任豈可稍涉推諉倭仁所奏著毋庸
議○諭軍機大臣等崇實駱秉章奏陝捻意圖南竄請飭左宗棠
先趨興漢一摺捻股屬聚整鄠等處意圖竄擾興漢惟見在甘省

大股回匪句合捻逆東擾岐郿興乾兇饑頗熾陝省兵力較單左宗棠定已兼程入關鎮壓調度能否分兵先趨興漢著左宗棠相機酌量鮑超一軍已疊諭該提督在鄂助剿勢難卽時入秦川省邊界與陝省南山在在毗連崇實駱秉章當速派兵勇分路扼要守禦毋令闖入川境原摺著鈔給左宗棠閱看將此由六百里各諭令知之○諭劉嶽昭奏剿平黔西大壘朵朵壩各賊壘並平遠解圍及請催席寶田赴遵義各摺片馬如龍奏啟程赴迤西剿賊請催撫臣來滇一摺劉嶽昭進攻黔西大定賊匪雖剿平大壘朵朵壩兩處賊壘究未能直抵豬拱箐辦理殊屬延緩見在席寶田已准其開缺畱於湖南辦理防務而總督勞崇光又復病故滇南省城空虛本日已嚴催張凱嵩迅赴新任但到任恐需時日著劉嶽昭督同岑毓英迅卽攻克豬拱箐賊巢疏通川黔邊境馳赴滇

省鎮攝調度以資表率馬如龍進攻大理早經諭令相機督剿見派副將楊振鵬等分路前進而該提督仍駐祿豐距大理甚遠何能遙制一切況總兵楊盛宗遠在迤東若調赴迤西則滇省東路亦未免空虛著宋延春傳諭馬如龍見已催令張凱嵩劉嶽昭赴任而省城又有該臬司護理督篆足以坐鎮該署提督不妨西征肅清大理迅奏膚功榮膺懋賞以慰廛懷至該署提督奏報督臣出缺尙知緩急嗣後軍務事件仍由宋延春馳奏以符舊制將此由六百里諭知劉嶽昭並傳諭宋延春知之○諭前有旨授張凱嵩爲雲貴總督並命吳昌壽署理廣西巡撫飭令迅赴署任以便張凱嵩交卸赴滇本日據署雲南提督馬如龍馳奏滇省迤西各匪聞三路進剿之信勢已蠢動該署提督刻已進軍祿豐嚴飭各軍由定遠大姚等處三路進剿未能兼顧省垣勞崇光因病出缺

省城見無督撫坐鎮恐匪徒又生覬覦各等語雲南省城自去歲勞崇光入城鎮撫甫就安謐見在迤西未定各將士帶兵在外勢難兼顧必須有督撫大員入城坐鎮卽著馬新貽仍遵前旨查明吳昌壽曾否啟程迅速催赴署任不准稍涉延緩該署撫到任後張凱嵩著卽交卸啟程迅赴新任妥爲籌辦以冀肅清邊圉將此由六百里各諭令知之○予貴州傷亡通判陳維新祭葬世職○已卯諭軍機大臣等左宗棠奏行抵德安擬俟淮霆各軍赴鄂再行入陝一摺見在鄂捻西竄而淮霆各軍尙未趕到左宗棠擬在德安稍停數日視賊所向再定進止洵能力顧大局不分畛域著該大臣探明如賊由臼口西竄卽行督軍會剿以收夾擊之效惟奏中捻回交訐勢甚猖獗而喬松年等布置未能裕如淮霆各軍趕到左宗棠仍卽入關進駐西安妥爲調度左宗棠另摺奏擬援

照成案於上海洋商借銀一百二十萬兩由各關稅項下撥還等語陝甘需餉孔殷各省協解恐不能如期停兵待餉於剿賊機宜未免延緩自應照該大臣所請迅籌鉅款以期集事卽著曾國藩等督飭各海關監督按照左宗棠所定數目出給印票發交道員胡光墉等向洋商支借兌付山西解州一面將匯票解赴該大臣軍營提用所借銀兩自本年七月起分六箇月於各關稅項下撥還仍飭各該省藩司將應解甘餉按月撥交各關以清款項其餘息銀等項均著照所議辦理原摺著鈔給曾國藩等閱看另片奏江海關協濟甘餉請仍照原撥續撥數目每月解銀三萬兩或該省未能遵撥卽於江甯應解甘餉內劃撥二萬兩各等語卽著曾國藩郭柏蔭遵照辦理其穆圖善月餉卽由左宗棠撥給原片並著鈔給曾國藩郭柏蔭閱看將此由六百里諭知曾國藩左宗棠

英桂吳棠瑞麟譚廷襄曾國荃馬新貽蔣益澧郭柏蔭並傳諭周
開錫知之○諭庫克吉泰等奏近日軍情一摺擒匪句結回逆屬
聚乾州臨平鎮一帶前股竄至醴泉經郭寶昌率兵迎剿將回匪
所踞之傅家莊攻破並將後股援賊擊敗追至乾州續獲勝仗劉
松山黃鼎等軍亦均至乾攻破賊堡譚玉龍劉效忠等軍分路進
逼以期三面合攻直搗臨平此時賊匪不患其合而患其分該逆
既聚一處卽著喬松年商同庫克吉泰等督飭諸軍合力攻拔
賊巢將該逆就地聚殲並分派各軍嚴扼紛竄其由甘省續竄長
武回匪並著喬松年分兵迎剿嚴密堵截以固腹地將此由六百
里各諭令知之○庚辰諭軍機大臣等庫克吉泰等奏稱回擒竄
擾興平咸陽一帶官軍迎剿獲勝一摺回擒大股由乾州竄及興
平經德興阿督率馬步各軍堵剿斬獲甚多其馬賊由興平一路

分竄咸陽又經官軍衝殺該逆遂率大股擾至咸陽白原因城防嚴密繞向東北而去此次官軍雖獲勝捷究未大挫兇鋒庫克吉泰等所部馬隊已派赴劉松山軍中所存馬步各軍不敷剿截卽著飛飭劉松山等軍迅據渭河杜賊分竄陝垣城大兵單著喬松年密籌防守毋稍疏虞庫克吉泰等仍當懷遵昨日諭旨商同喬松年嚴檄譚玉龍黃鼎各軍覘賊所向跟蹤窮追並合力追拔賊巢以期盡殲醜類又片奏訊據賊供欲由華州一路回撲省城又欲搶渡黃河伺便卽走等語賊蹤飄忽靡常難保不此擊彼竄秦晉僅一河之隔關繫非輕著趙長齡飭令陳湜實力嚴防不得稍形疏懈儻任該逆乘間渡河擾及完善惟趙長齡等是問至馬賊沿北原一帶折向西趨蓄謀甚詭庫克吉泰等務須相機進剿力殄狂氛所有各軍接仗情形仍著隨時詳報以慰廑繫將此由六

百里諭知庫克吉泰德興阿喬松年趙長齡並傳諭陳湜知之○

辛巳 上詣 大高殿祈雨○諭內閣楊岳斌奏拏獲會匪正法

請飭各省一體嚴拏等語甘肅委員候選知縣郭祖漢竟敢約黨
燒香充當會首劫財鬪餉罪惡多端實爲法所難貸郭祖漢卽郭
樞林業經拏獲正法並將同時倡會之都司李桂芳等一併正法
足以戢兇黨而遏亂萌各路軍營員弁每有設立江湖哥弟會名
目散布黨與挾制把持此風一開實與軍務大有關繫不可不嚴
行查禁以肅營規著各省統兵大臣隨時認真稽查如有前項弊
端立即嚴拏懲辦毋令相率效尤致滋隱患○予甘肅陣亡副將
黃益瑞等祭葬世職○壬午諭軍機大臣等玉通奏籌辦西甯漢
回一摺西甯漢回連年不靖疊經玉通設法解散總未安輯南川
漢團與回民甫經和息而河州回逆馬占鰲又復糾眾撲入碾伯

擾及西甯大肆焚掠雖經丹金扎布等曉諭退去難保不復圖窺擾玉通見飭漢民紳商及回目馬桂源設立總局協同防守務當妥爲彈壓漢團人等固不得有意尋釁致令回民疑懼亦不可偏聽回民之詞復墮詭計參將孟柏林辦撫旣無成效且有騷擾情事著玉通咨令楊岳斌將該員撤回參辦西甯餉項支絀情形甚迫著趙長齡卽飭藩司在協甘餉內撥銀五萬兩迅派妥員徑解西甯以資接濟毋稍遲誤玉通另片奏該衙門需用辦公硃紅紙筆例銀不敷請於羨稅內添撥銀一百兩永爲定例等語著照所請咨行楊岳斌飭藩司照數撥給將此由五百里各諭令知之○擒逆竄鍾祥諭巴揚阿嚴防江岸○癸未以孟夏時享太廟上前期親詣行禮○諭軍機大臣等趙長齡奏陝省回捻勢欲東趨而韓城縣屬之砂仁溝有空船多隻不肯移泊東岸移會地方

官率多空言移覆請旨嚴飭提泊一摺從前宋憬詩由西岸搶船東渡竄入晉省曾將把持船隻之紳士王鳳翔徇縱之縣令方鼎錄等嚴行懲辦此次防務更爲緊要若再聽該處商民把持阻撓必致貽誤大局著喬松年嚴檄韓城縣令及沿河一帶地方迅將該處船隻悉數提泊東岸儻有抗違立即嚴行查辦先將船隻焚毀並著陳湜派兵一體嚴查遵辦毋稍姑容以絕搶渡將此由六百里各諭令知之○是月緩徵陝西榆林縣被雹上年下忙錢糧